

## **Carta nu cuítí naçahyí Pablo nuú na cúú cuéntá Jesús ndúu ñuu Corinto**

*Cáhan Ndióxi Pablo xihín na cúú cuéntá Jesús ndúu ñuu Corinto*

<sup>1</sup> Yehe cúú Pablo, da naçaxi Ndióxi cacuu apóstol cuéntá Jesucristo jáchi já cúní a caja. Yehe xihín ñaní Sóstenes <sup>2</sup> chindahá nde Ndióxi coo ndó, na cúú cuéntá Jesús ndúu ñuu Corinto jan jáchi in cúú ndó xihín Jesucristo. Mé Ndióxi naçaxi a ndohó cacuu ndó ñayivi yíi, na nandiquiahva mé ná ndáha mé á. Ta quiahva já naçaxi ri a java ga na ndúu ndijáa ñuu cacuu na cuéntá mé á, na cája cáhnu Jesucristo, xitoho í jáchi cúú ri a xitoho mé ná. <sup>3</sup> Ña cúní quéa ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

*Ñamaní cája Ndióxi xoho sahá ña cándéé ini Jesucristo*

<sup>4</sup> Níi tiempo ndíquiahva i ndixahvi nu Ndióxi jáchi naçaja mé á cuahá ñamaní xihín ndo sahá ña cándéé ini ndó Jesucristo. <sup>5</sup> Ta sahá ña in nanduu ndó xihín mé á sahá ña cán quéa naçaja Ndióxi cuahá ñamaní xihín ndo já ná cuu çahan vaha ndó saha mé á. Ta já nasuná a xíní túní ndo já ná candaa vaha ini ndó saha mé á. <sup>6</sup> Ta ña naçachi i xihín ndó sahá Jesucristo naçinu a ini ndó ta viti cája ndó ña cúní mé á caja ndó. <sup>7</sup> Ta viti nani ndáti

ndó quiví quixi tucu Jesucristo, xitoho í ñuyíví yóho ni in túhún toho ñaha a ndímaní nu ndo ña ná caja ndó ña cúni Ndióxi jáchi nasahan mé á tóco ndihi ñaha nu ndo. <sup>8</sup> Mé Ndióxi chindeé a ndohó já ná caca tuun ndó íchi cuéntá mé á janda quiví nu ndíhí. Ta já ná a cúu chícāan ñayivi cuachi jata ndo tá ná xinu coo quiví quixi tucu Jesucristo, xitoho í ñuyíví yóho. <sup>9</sup> Jáchi cája tá cája Ndióxi ña sáhan mé á tuhun a caja. Ta mé á quea naçaxi a mí ña ná in cacuú xihín Jesucristo, xitoho í ña cúu in túhún jini já jahyi mé á.

*Tává xoo java na cúu cuéntá Jesús mé ná*

<sup>10</sup> Candehé ndo, ñani mí i, na cúu cuéntá Jesús. Xíca tahví i nu ndo xihín quiví Jesucristo, xitoho í ña ná ndique táhan víi tuhun ndihi ndó ta a cáhnda táhan ndó. Xíní ñúhú cuni táhan vaha ndó ta in túhún ñaha cañuhu ini ndó saha. Ta quiahva já ndítahan coo jini ndihi ndó. <sup>11</sup> Candehé ndo, ñani mí i, na cúu cuéntá Jesús. Cáhan i ña yóho xihin ndo jáchi naçaxi tuhun na vehe Cloé xihín i ña ndaja mé ndó cáni táhan ndó. <sup>12</sup> Jáchi nañehé e tuhun ña java ndó cáhí ndo ña cúu ndó cuéntá yehe, da cúu Pablo. Ta java ndó cáhí ndo ña cúu ndó cuéntá Apolos. Ta java ndó cáhí ndo cúu ndó cuéntá Pedro. Ta java ndó cáhí ndo cúu ndó cuéntá Jesucristo. <sup>13</sup> Ta xihín ña yóho ña cája ndó quea sáhnda java táhan ndó. Candehé ndo. Coó naxihí i, da cúu Pablo ndica crúxu saha ndo já ná jácacu u ndohó. Ta ni coo naçandúta ndó cuéntá mí i. <sup>14</sup> Ndixahvi Ndióxi coo najácandúta i ndohó. Jáchi ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihin

Gayo cuití va. <sup>15</sup> Ña cán quéa ni in tühún ndó a cúu cachi ndó ña ñacandúta ndó cuéntá mí i jáchi coó najácandúta toho i ndohó. <sup>16</sup> Ta ndícuñun ini i ña najácandúta ri ña vehe Estéfnas. Ña yóho cuití cúu ña ñúhu ini i najácandúta i. <sup>17</sup> Jáchi coó ñachindahá toho Jesucristo yehe ña ná caca nuu i jácandúta i ñayivi. Ñachindahá mé á yehe ña ná caca nuu i cañan i tuñun vaha saha mé á xihín ñayivi já ná cuu cacu ndaa ínimá ná. Ta coó toho tuñun ndíchí cáñan i xihín ná jáchi coó cúni jánuu ndáha i xihín tuñun cáñan i yóho tóco ndihi ña ñacaja Jesucristo tá ñaxihi a ndica crúxu saha yo.

*Ndíchí jini Jesucristo ta tin ndée mé á quíxi nu Ndióxi*

<sup>18</sup> Ñayivi, ña xíca cuañan ndihi saha ná ini in-dayá, mé ña cán cáñan ña ña cúu yó ña tachi tá cáñan yó ña ñaxihi Jesucristo ndica crúxu já ná cacu ndaa ínimá ná. Joo nu mí, ña ñasacu ini Ndióxi jácacu a cávatá yo cándaá ini ña xihín ndée Ndióxi ñaxinu tuñun mé á nu yo. <sup>19</sup> Já cáchí tuñun Ndióxi já:

Jándihi i sahá ña ndíchí jini ñayivi ñuyíví,  
ta a quéhe e cuéntá sahá ña cándaá ini ñayivi, já ñacahyi a nuú tuñun Ndióxi.

<sup>20</sup> Sahá ña cán quéa coó saha toho ñaha ñuyíví yóho nu Ndióxi vatí da ndíchí jini xihín da tácu ini cáñan da ña cúu dá da ndíchí ndivaha sahá ña xini da cañan da sahá ñaha ñuyíví yóho. Joo ñacaja Ndióxi ña ná cacuu a ña coó saha. <sup>21</sup> Sahá ña ndíchí jini Ndióxi, coó cúni mé á ña ná cuu cándaá ini ñayivi saha mé á xihín ña ndíchí quixi jini ñayivi ñuyíví. Ña ñacaja mé á quéa ñachindahá a java

ñayivi ña ná caħan na tuħun vaħa saħa mé á já quéa ndá na cándúsa ña ta cándeé ini na Ndióxi já cuu caĉu ndaa ínima ná. Ta ña yóho cúú á in ña taĉhi ndivaħa nuú ñayivi ñuyíví.

<sup>22</sup> Jáchi ñayivi Israel cáchi na ña ndúsa cuni na ña xitúhún ndivaħa já cuu candúsa na tuħun vaħa saħa Jesús. Ta na tóho, na ñuu Grecia cúni na ña ná caħan ndíchi ndivaħa ñayivi xihin ná já cuu candúsa na ña. <sup>23</sup> Joo mé nde xíca nuu nde cáxi tuħun nde nuú ñayivi saħa Jesucristo, mé a na xihí ndica crúxu saħa ñayivi. Joo tá xini joho na Israel ña yóho já ndíhíhví na. Ta tá xini joho na tóho ña yóho já cáhán na ña cúú á ña tóntó ndivaħa. <sup>24</sup> Joo tóco ndihi na naĉaxi Ndióxi cacuu na cuéntá mé á, á cúú ná na tóho á cúú ná na Israel, cándaa ini na ña cáħan nde saħa Jesucristo, ña iin ndée mé á jácaĉu a ñayivi. Ta xini vaħa na ña ndíchi ndivaħa jini mé á naĉaja Ndióxi. <sup>25</sup> Nuú ñayivi ñuyíví ña cája Ndióxi cúú á ña tóntó ndivaħa. Joo ña cája Ndióxi cúú á ña ndíchi chága nu ndíhi ñaha cája ñayivi ñuyíví. Ta vaťí cáchi ñayivi ña co ndíyahví ña na xihí Jesucristo ndica crúxu joo yahví chága ña yóho a juú ga inga ñaha cuu caja ñayivi. <sup>26</sup> Candehé ndo, ñani i, na cúú cuéntá Jesús. Naĉaxi Ndióxi ndohó cacuu ndó cuéntá mé á vaťí chá cuití ndó cúú ndó na ndíchi jini nuú ñayivi ñuyíví. Ta chá ndó cúú ndó na náħnu nuú ñayivi ta chá cuití ndo cúú ndó na cuićá. <sup>27</sup> Joo naĉaxi Ndióxi ñayivi, na cáchi ñayivi ñuyíví cúú ná na tóntó jini já quéa ná cacahan nuú na ndíchi jini. Mé Ndióxi naĉaxi a ñayivi vitá ná cacuu na cuéntá mé á já ná cacahan nuú na náħnu ndúu ñuyíví yóho. <sup>28</sup> Ñayivi, na coó

saha ñuyiví yóho, na quéhe núu ñayivi saha, na cán cúu na naçaxi Ndióxi. Ta naçaxi a na co ndáyahvi toho ñuyiví yóho ña ná nuu ndáha na náhnu cuéntá ñuyiví yóho. <sup>29</sup> Ta xihín ña yóho cándaã ini ñayivi ña a cúu ndiñehe jícó na mé ná nu Ndióxi. <sup>30</sup> Mé Ndióxi quéa naçaja ña ná in nduú xihín Jesucristo. Ta naçaja mé á ña ná ndindichí jiní yo. Ta naçaja mé á ña ná canduu ndaa yó nu Ndióxi. Naçaja mé á ña ná nduú ñayivi yij, na cúu cuéntá mé á. Ta mé á najáçacu a mí nuú cuachí. <sup>31</sup> Ta já cáchí tuhun Ndióxi já: “Ndá na cúni caja lándã, xini ñúhú caja lándã na sahá ña náhnu naçaja Ndióxi saha ná.”

## 2

*Cáxi tuhun Pablo ña naxihí Jesucristo ndica crúxu sahá cuachi ñayivi*

<sup>1</sup> Candehé ndó, ñani i, na cúu cuéntá Jesús. Tá nasahan i naçahan i ña ndaa cuéntá Ndióxi nu ndo, coo naçahan i ña xihín tuhun ndichí ñuyiví yóho. <sup>2</sup> Joo nasacu ini i çahan i sahá Jesucristo cuití va tañu ndó, mé a naxihí ndica crúxu. <sup>3</sup> Tá nasahin i tañu ndó, coo nandiñehe jícó i mí i. Ña naçaja i quéa yíhví yíhví cúu u anda quiji ninu i. <sup>4</sup> Ta tá naçasahá i cáxi tuhun i tuhun vaha sahá Jesucristo nu ndo, coo toho tuhun ndichí naçahan i xihin ndo ña ná cava i jiní ndó xihin á, vaha. Ña naçaja i quéa naçahan i xihin ndo xihin ndée inima yij Ndióxi ta mé a najáxinu a ini ndó xihin ndée mé á. <sup>5</sup> Já quéa ná candaã ini ndó ña Ndióxi quéa cája ña ná candeé ini ndó mé á xihin ndée mé á. Ta coo cúu á sahá ña ndichí quíxi jiní ñayivi ñuyiví yóho.

*Ínima yii Ndióxi cája ña ná candaá ini ñayivi saha mé á*

<sup>6</sup> Joo tá ndítúhún nde xihín na sa cándaá vaha ini ñaha Ndióxi já cáhan nde tühun ndíchí xihín ná. Joo co cáhan nde tátuhun cáhan ta ndíchí ndúu ñuyíví yóho. Ta ni co cúú á tátuhun ña cáhan da ndíchí, da cómi cuéntá sahá ñuyíví yóho. Jáchi yachi ndihi sahá na cán. <sup>7</sup> Ña cáhan nde cúú á ña ndíchí cuéntá Ndióxi. Ta cúú á ña nasahin jehé, ña co xini ñayivi saha janda tá cámaní cava sahá saha ñuyíví. Jáchi janda mé tiempo já nasacu ini Ndióxi ndá quiahva caja jácacu a mí anda ama cáa quivi.

<sup>8</sup> Ta ni in túhún na náhnu cómi cuéntá sahá ñuyíví yóho co candaá ini na ña nasacu ini Ndióxi jácacu a mí. Jáchi tá ná candúsa na ña já quéa a cáta caa toho na Jesucristo, xitoho í ndica crúxu, nduu. Jáchi mé Jesucristo cúú á ña cáhnu ndivaha. <sup>9</sup> Ta já cáchi tühun Ndióxi já:

Ni in túhún ñayivi a ñaha cuni na ta a ñaha cuni joho na,  
ta ni a ñaha cahvi ini na,  
ndá quiahva in ña náhnu sácú ini Ndióxi quiahva  
núú ñayivi tá quihvi ini na mé á, cáchi tühun  
Ndióxi.

<sup>10</sup> Nacaja ínima yii Ndióxi ña ná candaá ini tóco ndihi ña yóho. Jáchi ínima yii mé á sádehé a tóco ndihi ñaha ta xini a janda ña cáhvi ini mé Ndióxi.

<sup>11</sup> Ni in túhún ñayivi co xini na ña cáhvi ini inga na. Ínima in in na cuití va xini a ña cáhvi ini in in na. Quiahva já in ri xihin Ndióxi va. In túhún ínima yii mé á xini ndía cáhvi ini a. <sup>12</sup> Nasahan Ndióxi ínima yii mé á nu yo ta co cúú á tátuhun ínima ñayivi ñuyíví. Ta nacaja mé á ña ná candaá

iní ndaja íin ña náhnu sáhan mé á nu yo. <sup>13</sup> Ta tá cáhan nde sahá ña yóho, cáhan nde tá quiahva najánaḥa ínima yii Ndióxi nuú nde. Ta co cáhan nde ña xihín tuhun ndíhí ñacatiaḥva nde ñuyíví yóho. Quiahva já ndícani nde ñaha Ndióxi xihín na ñúhu ínima yii Ndióxi ini.

<sup>14</sup> Tóco ndihi ña yóho cúu á ña tóntó ndivaha nuú ñayivi, na co ñúhu ínima yii Ndióxi ini. Co ndíquehe vaha na ña ta ni a cúu candaḥ ini na ndaja íin a jáchi na ñúhu ínima yii Ndióxi ini, na cán cúu ndusa na candaḥ ini ñaha Ndióxi. <sup>15</sup> Joo na ñúhu ínima yii Ndióxi ini, na cán cúu na candaḥ ini ndá ñaha cúu ña vaha ta ndá ñaha co cúu toho ña vaha. Ta xihín ña yóho cátóntó ñayivi ñuyíví jáchi co candaḥ ini na ña cúu cuéntá Ndióxi. <sup>16</sup> Jáchi cáhí tuhun Ndióxi: “Ni in túhún ñayivi a cúu candaḥ ini na ña cáhvi ini Ndióxi, xitoho í. Ta ni in túhún na a cúu cachi xihín mé á ña ndítahan nu á caja”, cáhí tuhun Ndióxi. Joo mí, na cúu cuéntá Jesús, cáhvi iní tá quiahva cáhvi ini Jesucristo jáchi ñúhu ínima yii Ndióxi ini mí, na cúu cuéntá mé á.

### 3

#### *Na caja chúun cuéntá Ndióxi*

<sup>1</sup> Candehé ndó, ñani i, na cúu cuéntá Jesús. Coó ñacuu cáhan i xihín ndo tá quiahva cáhan i xihín na ñachutú ndaḥ xihín ínima yii Ndióxi. Jáchi mé ndó cúu ndó tátuhun léé loho ña chíhí jáchi a ñaha cuahnu ndó xihín tuhun Ndióxi jáchi cája ndó ña xíca ini yiquí cuñu ndó caja tá quiahva cája ñayivi ñuyíví. <sup>2</sup> Sahá ña cán quéa tá najánaḥa i tuhun Ndióxi nu ndo, coó ñacuu jánaḥa i ña ihvi chága nu ndo jáchi a cúu candaḥ ini ndó ña. Ña ñacaja i xihín

ndó quéa nasahan i tátuhun leche nu ndo jáchi cúu ndó tátuhun na valí chíchí sahá ña a cuú cuxu ndó ñaha veē. Ta janda viti co ín tiahva ndó jácuaha ndó ña ihvi chága cuéntá tuhun Ndióxi. <sup>3</sup> Jáchi cúu yji va ndó tátuhun ñayivi ñuyíví. Ndaja táhan mé ndó cáhivvi ini xihín táhan ndó ta cáni táhan ndó ta sáhdá java táhan ndó. Ta xihín ña yóho cája ndó ña cúni mé cuití ndo tá quiahva cája ñayivi ñuyíví. <sup>4</sup> Java ndó cáchí ndo ña cúu ndó cuéntá yehe, da cúu Pablo. Ta java ndó cáchí ndo ña cúu ndó cuéntá Apolos. Ta xihín ña yóho sáhdá java táhan ndó ta náha ndó ña cája ndó tá quiahva cája ñayivi ñuyíví.

<sup>5</sup> Ndá da cúu Apolos xihín yehe ña ná cani táhan ndó sahá nde. Co ndítahan caja ndó já jáchi mé nde cúu nde da xica nuu cája chúun cuéntá Jesucristo, xitoho í cuití va. Ta sahá chuun cája nde yóho nacu nacadúsa ndó mé á. Ta ña yóho cúu chuun nanaha Jesucristo, xitoho í nuú yehe xihín nu Apolos caja nde. <sup>6</sup> Ña nacaja nde cúu á tátuhun ña cája na tá xútu na. Ta yehe cúu u tátuhun da nachihin tata jáchi naxaxi tuhun i tuhun Ndióxi nu ndo. Ta Apolos cúu dá tátuhun da naxojo ticuú nuú a cán jáchi najánaaha chága da tuhun Ndióxi nu ndo. Joo Ndióxi quéa nacaja ña ná cuahnu a jáchi cája mé á ña ná cuu cuahnu ndó xihín tuhun mé á. <sup>7</sup> Sahá ña cán quéa vatí yehe cúu u da naxutu ta Apolos cúu dá da naxojo ticuú joo ni in túhún nde coó saha. Cáhnu cúu Ndióxi jáchi mé á quéa nacaja ña ná cuahnu mé tata naxutu nde cán. <sup>8</sup> Xíní ñúhú candaa ini ndó ña in cúu va na chíhin tata xihín na xójo ticuú nu á. Ta tá in tá in chuun nacaja in in na cán quehe na yahvi saha. <sup>9</sup> Yehe xihín Apolos in



cúu nde cája chúun nde cuéntá Ndióxi. Ta mé ndó cúu ndó tátuhun in yójo nuú nasacu Ndióxi ndehe caja chúun nde cuéntá mé á.

Ta jári cúu ndó tátuhun in vehe ña cávaha Ndióxi. <sup>10</sup> Ta yehe cúu u tátuhun da cávaha mé vehe yóho. Ta mé Ndióxi quea nasahan ñamanj nuú i ña ná taán i yuu ndúhu sahá ta ná jácava sahá i ña. Ta inga na xíní ñuhú caja chúun xihin á. Joo ndítahan candehé vaha na ndaja caja na chuun yóho. <sup>11</sup> Jáchi in túhún Jesucristo cúu á tátuhun yuu ndúhu sahá vehe yóho. Ta ni in na a cúu tavá xóo na ña ta já cacu na inga ñaha. <sup>12</sup> Mé na cávaha vehe nuú yuu ndúhu yóho cuu jáxinu na ña xihin jiuhun cuáán ta cuu caja na ña xihin jiuhun cúxú ta cuu caja ri na ña xihin yuu ñúchí. Ta jári cuu caja na ña xihin yító ta cuu caja ri na ña xihin xehe ndíyoho ta janda xihin toñamá cuu caja na ña. <sup>13</sup> Joo vaxi quivi quixi tucu Jesucristo coto ndojó mé á chuun nacaja in in ñayivi cuéntá mé á. Cacuu a tátuhun coto ndojó a ña xihin ñuhú cáyi já quea ná naha nu á, á ndihi sahá, á co ndíhi sahá. Ta xihin ña yóho naha nu á, á vaha nacaja chúun ñayivi cuéntá mé á, á a váha toho nacaja na. <sup>14</sup> Ta tá coo nandíhi sahá ña nacaja na cán já quea chahvi Ndióxi na sahá chuun nacaja na. <sup>15</sup> Joo tá ná cayi ña nacavaha na cán já ndíhi saha tóco ndíhi chuun nacaja na vatí mé ná cacu ndaa ínimá ná. Ta ña yóho cacuu a tátuhun tá jácacu in dataa mé dá tá quéta da ini in vehe tá cáyi a xihin ñuhú ita.

<sup>16</sup> Á co xínj ndó ña cúu ndó tátuhun veñuhu Ndióxi tá ndacaan ínimá yij mé á ini ínimá in in ndó. <sup>17</sup> Ta ndá na ná jándíhi na sahá veñuhu Ndióxi

yóho já quéa jándihi Ndióxi sahá na cán. Jáchi yii ndivaḥa veñuhu Ndióxi. Ta mé ndó cúu ndó tátuhun veñuhu Ndióxi cáhan i saḥa jan.

<sup>18</sup> Candehé ndo. Ndá ndó cáhán ña cúu ndó na ndíchí jini sahá ña xini ndó ñaha ñuyívi yóho, xini ñúhú candaa ini ndó ña cúu á tátuhun jándahvi ndó mé ndó. Xini ñúhú ndaja ndó mé ndó tátuhun na co xini já quéa ná nuná nu Ndióxi jánaḥa nu ndo ndaa cúu ndusa na ndíchí jini. <sup>19</sup> Jáchi ña ndíchí quíxi jini ñayivi ñuyívi cúu á ña tóntó ndivaḥa nu Ndióxi. Já cáchi tuhun Ndióxi já: “Ña cája mé á quéa ná cachihin saḥa ná xihin ña ndíchí quíxi jini mé va na.” <sup>20</sup> Quiahva já cáchi ri tuhun Ndióxi: “Cándaá cáxi ini Ndióxi ña coo saḥá ña cáhvi jini na ndíchí ndúu ñuyívi yóho”, já cáchi tuhun Ndióxi. <sup>21</sup> Sahá ña cán quéa ni in túhún ñayivi co ndítahan ndiñehe jícó na mé ná saḥá ña tiaḥva in ñayivi ñuyívi yóho cája na. Xini ñúhú ndicuhun ini ndó ña naṣahan Ndióxi tóco ndihi ñaha nu ndo. <sup>22</sup> Nandiquiaḥva mé á ndeḥe, da cúu Pablo xihin Apolos xihin Pedro nu mé ndó já ná cuu jánaḥa nde tuhun Ndióxi nu ndo. Naṣahan mé á ñuyívi yóho nu ndo já ná cuu catacu ndó. Ta naṣacu ini mé á quívi quivi ndó ta já tandaa quívi cuhun ndó coo ndó xihin mé á. Tóco ndihi ña yóho naṣahan Ndióxi nu ndo. <sup>23</sup> Ta mé ndó cúu ndó cuéntá Jesucristo ta Jesucristo cúu á cuéntá Ndióxi.

## 4

### *Ndicani Pablo ndaja ün chuun cája na apóstol*

<sup>1</sup> Co ndítahan toho ndaja cáhnu ndó ndeḥe. Xini ñúhú quehe ndó cuéntá ña naṭahnda chuun nuú

nde caja chúun nde cuéntá Jesucristo jánaḥa nde ña coó nasaxíni ñayivi jihna, ña nasacu ini Ndióxi caja. <sup>2</sup> Ta ndá da ndíquehe in chuun, xíní ñúhú nahá da ña mé a ndaa cuu candeeé ini na da, ña mé a ndaa caja tá caja da chuun natahnda nu dá caja da. <sup>3</sup> Ta cája i cuéntá ñacaja vaha i chuun nasahnda Ndióxi nuú i caja i. Sahá ña cán quea co sáhní toho i mí i tá chícaan ndó cuachi jatá i. Ta co ndícani ini i tá java ga ñayivi chícaan na cuachi jatá i. Jáchi cája i cuéntá coó toho cuachi ñacaja i. <sup>4</sup> Tá ná cachi i xihín ndo ña coó toho cuachi ñacaja i, co cúní cachi i ña mé a ndaa co ndójo ga i cuachi. Jáchi xíní vaha Jesucristo, xitoho i á ñacaja vaha i á coó ñacaja vaha i. <sup>5</sup> Sahá ña cán quea co xíní ñúhú ndíhi ini ndó candehé ndaa ndó ñayivi. Xíní ñúhú candati ndó jandá quiahva ná quixi Jesucristo caja vií mé á sahá ñayivi já ná nditívi ña ñúhu ínima in in ñayivi. Ta xihín ña yóho cuni tóco ndíhi ñayivi ña cáhvi ini na. Anda jávi ndaja cáhnu Ndióxi na ñacaja vaha.

<sup>6</sup> Candehé ndo ñani i, na cúu cuéntá Jesús. Sahá ña cúní nde ña ná candaa ini ndó ndía ndítahan caja ndo sahá ña cán quea ndícani i nu ndo saha Apolos xihín saha mí i. Jáchi ín in tuhun ta cáchí a ña co ndítahan nu ndó caja cáhnu ndó in ñayivi nani quehe núu ndó inga na. Ta xihín ña yóho cuu candaa ini ndó ña co ndítahan ndínehe jícó ndo mé ndó sahá ña cúu ndó cuéntá in da jáchi xihín ña yóho jánuu ndáha ndó inga na táhan nde. <sup>7</sup> Jáchi ni in ndó co cúu ndó na náhnu chága a juú ga inga na. Xíní ñúhú candaa ini ndó ña tóco ndíhi ña cómí ndo cúu á ña nasahan Ndióxi nu ndo. Sahá ña cán quea co ndítahan caja cáhnu ndó mé ndó sahá ña ñañehe

táhvi ndo nu Ndióxi.

<sup>8</sup> Cáhán ndo ña ni in ñaha co ndímaní nu ndo joo co cúú á ña ndaa. Cáhán ndo ña cúú ndó na cuicá joo co cúú á ña ndaa. Ta cáhán ndo cúú ndó na cómí cuéntá sahá ñayivi joo co cúú á ña ndaa. Cája ndó tátuhun co xíní ñúhú toho ndó ndehe. Vá ná cacomí ndusa ndó cuéntá sahá ñayivi já ná cacomí ri ndehe va cuéntá saha ná xihín ndo. <sup>9</sup> Cúú á tátuhun nasacu Ndióxi ndehe, na cúú apóstol janda nu ndíhí. Cúú nde tátuhun na ndícuíta yíco cuhun quivi. Ta janda joho sándehe ñayivi ñuyíví ndehe ta sácu ndaa na ndehe. Ta janda mé táto Ndióxi sándehe na ndehe cuahan nde. <sup>10</sup> Sahá ña quíhvi ini nde Jesucristo cúú nde tátuhun ñayivi tóntó ndivaha nuú ñayivi ñuyíví. Joo mé ndó nandaja ndó mé ndó tátuhun na xíní ndivaha saha mé á. Mé nde cúú nde tátuhun ñayivi vitá nuú ñayivi ñuyíví joo cája ndó tátuhun na ndacú ini. Ndája cáhnu ñayivi ñuyíví mé ndó nani quéhe núu na ndehe. <sup>11</sup> Ta janda viti ndóho tá ndóho ini nde. Java tañu coó ña cuxu nde ta coó ticují coho nde ta ni jáhma candixi nde coó. Ta janda joho cája xíxi ñayivi xihín nde. Ta ni vehe nde coó. <sup>12</sup> Ta a juú quiahva ndúcú ndéé nde cája chúun nde catacu nde. Ta tá chícaan ñayivi cuachi jatá nde já xíca tahví nde nu Ndióxi ña ná caja mé á ñamaní xihín ná. Ta cája ndeé ini nde tá cája xíxi na xihín nde. <sup>13</sup> Ta vitá cáhan nde tá ndúcú ñehe nde tuhun nuú ñayivi vatí cáhan núu na sahá nde. Mé nde cúú nde tátuhun xehé nuú ñayivi ñuyíví. Ta cája na xihín nde tá quiahva cája na xihín ñaha coó saha, ña nacandoo cuhun cuíta. Ta quiahva já cája na xihín nde janda viti.

14 Xíní ñúhú candaꝯ ini ndó ña co cáhyí i ña yóho nu ndo sahá ña cúni jácacahan i nuu ndo. Cáhyí i ña nu ndo jáchi cúu ndó tátuhun jahyi i. Ta jánaha i ña nu ndo tá quiahva cája in dataa xihín jahyi da jáchi quíhvi ini i ndohó. 15 Jáchi vatí ná coo uxu mil ñayivi jánaha na ndohó sahá Jesucristo joo in túhún yehe cúu tátuhun tátá ndo. Jáchi yehe cúu u da naçahan tuhun vaha sahá Jesucristo nu ndó nu cuítí ta já naçandee ini ndó mé á. 16 Sahá ña cán queá xíca tahví i nu ndó ña ná caja ndó tá quiahva cája i.

17 Sahá ña cán queá chindahá i Timoteo nu ndo jáchi cúu dá tátuhun jahyi maní i ta cája chúun da cuéntá Jesucristo, xitoho í xihin ndinuhu ini da. Ta jándicuhun ini da ndohó ndá quiahva cája i tañu na cúu cuéntá Jesús ta ndá quiahva jánaha i nu ná ndijáá veñuhu nu xíca i cahan i. 18 Java ndó naçasahá ndo cája lándá ndó jáchi cáhán ndo ña a sáa ga i coto nihni i ndohó. 19 Joo yachi saa i coto nihni i ndohó tá cúni Ndióxi. Anda já candehé e, á mé a ndaa ín ndée Ndióxi ini na xíca cája lándá jan á yúhu uun na cahan na. 20 Tá mé a ndaa cómi Ndióxi cuéntá sahá in ñayivi já queá ín ndée mé á ini na caja na ña cúni mé á. Ta coo saha toho a á tiahva ndivaha na cahan na. 21 Ta viti cachi ndó xihín i ndía queá catóo chága ndo. Á catóo chága ndo ña ná saa i jánani i ndohó sahá ña cája ndó ña núu. Á catóo chága ndó ña ná saa i ta vií vií cahan i xihin ndo jáchi najándacoo ndó ña núu cája ndó. Ndiá cúni ndó.

*Cáhan Pablo sahá in da ín xihín náná queén da*

<sup>1</sup> Sa nañehé e tuhun ña ín in da cúu cuéntá Jesús tañu ndó jan ta ín da xihín náná queén da. Ta ña yóho cúu á in cuachi cáhnu ndivaha. Ta ni ñayivi ñuyivi co cája ña yóho. <sup>2</sup> Ta vatí ín cuachi cáhnu yóho tañu ndó joo cáa ga ri ndóhó cája cáhnu ndó mé ndó. Xíní ñúhú cacuéha ini ndó sahá ña yóho. Ta xíní ñúhú tavá ndó da cája cuachi yóho tañu ndó jan. <sup>3</sup> Vatí co ín i xihín ndo jan joo ndícani ndivaha ini i sahá ña cúu jan. Ta cúu á tátuhun ín i xihín ndó jan ña cán quea sa nasacu ini i ña xíní ñúhú caja ndó xihín da cája cuachi jan. <sup>4</sup> Játaca táhan ndihi ndó na cúu cuéntá Jesucristo, xitoho í. Ta mé a cán quiahva ndée á nu ndo caja ndó ña cuni mé á. Ta cacuu a tátuhun coo i xihín ndó jan. <sup>5</sup> Anda já xíní ñúhú ndiquiahva ndó da jan ndáha tiñáhá sacuahá já ná jándoho rí ini yiquí cuñu da viti ta já ná cuu cacu ndaa ínima dá tá ná xinu co quivi quixi tucu Jesucristo.

<sup>6</sup> Co ndítahan caja lándá ndo sahá ña cája ndó. Xíní ñúhú ndicuhun ini ndó in tuhun ña cáchí já: “Chá cuití yusa naxaa jativí ndihi a java yusa ña ín vaha.” <sup>7</sup> Xíní ñúhú tavá ndo da jan tañu ndó jáchi cúu dá tátuhun yusá naxaa, ña jativí ña ín vaha. Ta xihín ña yóho quee ña núu veñuhu nu táca ndó jan jáchi sahá da jan cuu caquini inga na ta caja na cuachi. Xíní ñúhú canduu víi ndo tátuhun mé pan xíxi na vicó pascua jáchi coo yusá naxaa ñúhu xihín á. Ta Jesucristo nasacuu a tátuhun in ndicachi, rí najoco na nu Ndióxi vicó pascua sahá cuachi ñayivi jáchi naxihí a ndica crúxu sahá cuachí já ná cuu cacu ndaa ínima yo. <sup>8</sup> Sahá ña cán quea

ndítahan cajji iní sahá ña ñacaja Jesucristo. Xíní ñúhú jándacoo í ña núu sa ñacaja í jihna, ña cúu tátuhun pan naxaa. Ta xíní ñúhú caja í ña ndaa xihín ndinuhu iní. Ta ña yóho cúu á tátuhun pan ña coo ñacava táhan yusá naxaa xihin.

<sup>9</sup> Nu carta ñachindahá i nu ndó jihna ga, ñacachi i xihin ndo ña ná a catáhan ndó xihín ñayivi, na ndúu xihín na coo cúu yí ná á ñájíhí na. <sup>10</sup> Tá ñacachi i ña yóho xihin ndo coo cúni cachi a ña xíní ñúhú tavá xóo ndó mé ndó chí in ndeé nuú ñayivi ñuyívi yóho jáchi a cuú quee ndó ñuyívi yóho cuhun ndo. Ta mé a ndaa ndúu cuahá na ñuyívi yóho cája na cuahá cuachi xihín yiquí cuñu na ta catóo ndivaha na jjuhún ta cája cuíhná na ta cája cáhnu na yoco. <sup>11</sup> Ña cúni cachi i xihin ndo quea coo ndítahan catáhan ndó xihín na cáchi cúu cuénta Jesús nani cája na ña núu xihín yiquí cuñu na, á tá cúu ná na catóo ndivaha jjuhún, á tá cúu ná na cája cáhnu yoco, á tá cúu ná na tuhún, á tá cúu ná na xíhi, á tá cúu ná na cuíhná. Ta ni a cácco ndó cuxu ndó xihin ná tá cája na ña yóho. <sup>12</sup> Coo cáhan i sahá ñayivi ñuyívi jáchi coo ndítahan nuú i caja víi i saha ná. Joo ndítahan nu ndó candehé ndo ndaja cája na cúu cuénta Jesús ndúu tañu ndó jan. <sup>13</sup> Jáchi mé Ndióxi quea caja víi a sahá cuachi ñayivi ñuyívi. Ña cán quea ndítahan nu ndó tavá ndó da cája cuachi tañu ndó jan.

## 6

*Tá sácú saha táhan na cúu cuénta Jesús nuú na jutixia*

<sup>1</sup> Tá cō táhán ini ndó xihín ña cája ñani ndó, na cúú cuéntá Jesús cō ndítahan nu ndó cūhūn ndó cacu ndó saha ná nuú na jutixia, na cō cúú cuéntá Jesús. Ña ndítahan caja ndó quea cahan ndó xihín mé na cúú cuéntá Jesús ña ná caja vií na sahá ña cō táhán ini ndó xihín jan. <sup>2</sup> Á cō xini ndó tandaa quivi caja vií na cúú cuéntá Jesús saha tóco ndihi ñayivi ñuyivi. Ta tá mé ndó cacuu ndó na caja vií saha tóco ndihi ñayivi ñuyivi, ndá cuéntá quea cō cūni ndó caja vií ndó sahá ña válí cúu tañu mé ndó jan. <sup>3</sup> Ña xini ñuhú caja ndó quea nducú ndo caja vií ndo sahá ña cúu tañu ndó jan. Jáchi xini ñuhú ndicūhūn ini ndó ña janda tát Ndióxi caja vií yo saha. <sup>4</sup> Sahá ña cán quea tá cáni táhan ndó sahá ñaha válí ñuyivi yóho cō xini ñuhú toho cūhūn ndó cavií saha ndó nuú na cō cúú cuéntá Jesús. <sup>5</sup> Candehé ndó. Cahan i ña yóho xihín ndo já ná cacahan nuu ndo. Á cō íin in da tácu ini tañu ndó jan ña ná caja vií da saha ndó, vaha. Xini ñuhú ndindita in da tácu ini já ná cuu caja vií da sahá ña cúu tañu ndó jan. <sup>6</sup> Joo ña cája ndó quea cáni táhan ndaja táhan mé ndó ta já ndáca táhan ndó cuahan ndó cavií saha ndó nuú na cō cúú cuéntá Jesús. Cō ndítahan toho caja ndó já.

<sup>7</sup> Sa cuachi cáhnu ndivaha quea cája ndó tá cáni táhan ndaja táhan mé ndó jan. Vaha ná caja ndeé ini ndó tá cō cája vaha in na xihín ndo. Vaha ná caja ndeé ini ndó tá ná caja cuíhná na ñaha ndó. Jáchi cō ndítahan cacu saha táhan ndó nuú na cō cúú cuéntá Jesús. <sup>8</sup> Joo ña cája ndó quea ña núu xihín ñani táhan ndó ta janda cája cuíhná ndo ñaha ñani ndó, na cúú cuéntá Jesús.



9 Xíní ñúhú candaá ini ndó ña coó saha toho ñayivi cája ña núu jan cuhun na nuú cacomí Ndióxi cuéntá saha ná. A jándahvi ndó mé ndó jáchi na ndúu xihín na co cúu yíi ná á ñájíhí na a cuhun toho na nuú cacomí Ndióxi cuéntá saha ná. Ta ni na cája cáhnu yoco ni na ndúu xihín yíi á ñájíhí inga na ta ni da cúu ta líhi a cuhun toho na nu Ndióxi. 10 Ta ni na cuíhná ta ni na cátóo ndivaha jíuhún ta ni na xíhí ta ni na ndahnda yúhu ta ni na jándahvi ñahá ta ni in táhan na yóho a cuhun toho na nuú cacomí Ndióxi cuéntá saha ná. 11 Ta táhan na yóho nasacuu ri java ndóhó va, nduu. Joo viti sa nandaja vii Ndióxi ndohó ta naçaxi a ndohó cacuu ndó cuéntá mé á. Nanduu ndó ñayivi ndaa nu Ndióxi sahá ña naçaja Jesucristo, xitoho í ta sahá ña cája ínima yíi Ndióxi.

*Xíní ñúhú candaá í yiquí cuñu í jáchi cúu á ña yíi*

12 Ndúu java ñayivi ta cáchi na ña núná nu ná caja na ña cúni mé va na. Vatí mé a ndaa núná nu ná caja na ña cúni mé ná joo xíní ñúhú candehe na á vaha, á a váha ña cája na. Jáchi mé a ndaa núná nu yo caja í ña cúni mí joo co ndítahan quiahva í ñamaní ña ná cahnu ña núu yiquí cuñu í. 13 Ta cáchi na ña ín tixi yó sahá ña cán quea xíní ñúhú cuxú. Ta cáchi na ña xíní ñúhú cuxú jáchi ín tixí. Joo vaxi quivi jándihi Ndióxi saha ndíví ña yóho. Ta coó nasahan Ndióxi yiquí cuñu í nu yo ña ná caja í cuachi xihín á tátuhun ña ná coo í xihín na co cúu ñájíhí yo á yíi yo. Nasahan Ndióxi yiquí cuñu í nu yo já ná caja í ña cúni mé á. Ta naçaja mé á ña ná cacomí a cuéntá saha yo. 14 Ta tá quiahva naçaja

Ndióxi najánditacu a Jesucristo, xitoho í quiahva já caja rí a jánditacu a yiquí cuñu í xihín ndée mé á.

<sup>15</sup> Xíní ñúhú candaa ini ndó ña in cúu ndó xihín Jesucristo. Ta tá cuahan ndó cája ndó cuachi xihín najihí xíca jii, cúu á tátuhun ñéhe ndó Jesucristo cuahan cája ña núu. Co ndítahan caja ndó já. <sup>16</sup> Sa xíní vaha ndó ña tá quíhvi nuu in dataa xihín najihí xíca jii já quéa ndúu na tátuhun in víxí ñayivi. Jáchi cáchi tuhun Ndióxi já: “Tá ná ndique táhan in dataa xihín in ñáñáha já quéa ndúu na tátuhun in víxí ñayivi.” <sup>17</sup> Ndá na ndiquiahva mé ndáha Jesucristo, xitoho í já quéa in ndúu na xihín mé á jáchi ñúhu ínima yii Ndióxi ini na.

<sup>18</sup> Cama caxoo ndó nu tóco ndihi ña núu xíca ini yiquí cuñu ndó caja. Co ndítahan coo ndó xihín na co cúu ñájihí ndo á yí ndo jáchi ni in túhún toho cuachi co cája quini nahá xihín yiquí cuñu ñayivi tátuhun cuachi yóho. Jáchi ndá na ín xihín na co cúu yí ná á ñájihí na já quéa cája na cuachi nuú yiquí cuñu mé va na. <sup>19</sup> Xíní ñúhú ndicuhun ini ndó ña mé yiquí cuñu ndó jan cúu á tátuhun in veñuhu nu ndácaan ínima yii Ndióxi, mé a nasahan Ndióxi nu ndo. Ta viti yiquí cuñu ndó a juú ñaha mé ndó cúu á jáchi cúu á ñaha Ndióxi. <sup>20</sup> Jáchi yahvi ndivaha nachahvi Ndióxi saha ndo tá naxihí Jesucristo ndíca crúxu. Sahá ña cán quéa ndítahan caja cáhnu ndó Ndióxi xihín yiquí cuñu ndó ta jári xihín ínima ndo jáchi ndívi a cúu á cuénta Ndióxi.

## 7

*Tá tándaqa ñayivi*

1 Ta viti cúni nducú ñehé e tuhun nu ndo sahá ña nandaca tuhún ndó yehe nu carta nachindahá ndó nuú i. Cáchi i xihin ndó sahá da cámani tandaha ña vaha cája da tá ná coo tacú da. 2 Joo sahá cuachi cája ñayivi tá ndúu na xihín na co cúu ñájíhí na á yíi ná sahá ña cán quea vaha chága ná tandaha ná já ná coo ñájíhí in in ta ta jári najihí va ná coo yíi in in na. 3 Ta in dataa ndítahan ndiquiahva da mé dá nu ñájíhí da ta jári ñáñáha ndítahan ndiquiahva ñá mé ñá nu yíi ña jáchi quiahva já sáhdá a coo a. 4 Jáchi in ñáñáha, ñá natandaha co cómi ga ña cuénta saha mé ña jáchi yíi ña cúu da cómi cuénta saha yiquí cuñu ñá. Ta ni in dataa, da natandaha co cómi ga da cuénta sahá yiquí cuñu da. Ñájíhí da cúu ña cómi cuénta sahá yiquí cuñu da. 5 Sahá ña cán quea ndítahan ndiquiahva nu táhan ndó ta a cándají táhan ndó. Ta tá co cúni ndó cuju xitáhan ndó xíní ñúhú cacuu a sahá ña sa najándique táhan tuhun ndó ña a cúju xitáhan ndo sahá ña cúni ndó caca tahví ndó nu Ndióxi chá tiempo. Joo tá nandihí xíní ñúhú ndique táhan tucu ndó jáchi tiaha náa jácahan Satanás, mé tiñáha sacuaña ndohó ña ná caja ndó cuachi sahá ña a cuú cahnu ndó nuú ña xíca ini yiquí cuñu ndó caja.

6 Tóco ndihí ña cáhan i xihin ndo yóho co cúni cachi a ña xíní ñúhú tándaha ndo vatí cuu tandaha ndo tá cúni ndo. 7 Vatí mé a ndaa cájii ínii i tá ná canduu tacú ndihí ndó tá tuhun yehe. Joo sa jíin sa jíin nacaja Ndióxi xihín in in í. Java na ñéhe táhvi ná tandaha na ta java na ñéhe táhvi na canduu tacú na.

8 Ndá na ndúu tacú xihin ndá na ndúu cuáan,

ñá vaha chága quéa ná a tándaḥa ná ta ná canduu na tátuhun yehe. <sup>9</sup> Joo tá cō ndeé ini na caḥnu na yiquí cuñu na, vaha chága ná tandahá ná jáchi vaha chága ná tandahá ñayivi a juú ga ña ná ndiava íni na coo na xihín na cō cúu yí ná á ñájíhí na.

<sup>10</sup> Ta nu ndóhó, na sa ín yí á ñájíhí, sáhná i chuun nu ndó ña ná a jándacoo táhan ndó. Ta ña sáhná i nu ndo yóho cō cúu á ña naquixi jini mí i. Cúu á ña sáhná Ndióxi caja ndó. Cō ndítahan nuú in ñañaḥa jándacoo ña yí ña. <sup>11</sup> Ta tá ná jándacoo ña da, cō ndítahan nu ña tandahá ña xihín inga da. Á tá coo ta ña ndítahan caja ña quéa ndique táhan maní tucu ña xihín yí ña. Ta jári in dataa cō ndítahan nu dá jándacoo da ñájíhí da.

<sup>12</sup> Ín java ga ñaha cúni caḥan i xihín ndo. Mí i cáhán i ña vaha caja ndó ña vatí mé a ndaa cō cúu á ña nasahnda Ndióxi nuú i jánaḥa i nu ndo. Ta ña yóho quéa ña caḥan xihín ndo: Tá ín in da cúu cuéntá Jesús ta ín ñájíhí da, ña cō cúu cuéntá Jesús. Ta tá cáji ini ña coo ña xihín dá já quéa cō ndítahan nu dá jándacoo da ña. <sup>13</sup> Ta tá ín in ña cúu cuéntá Jesús ta ín yí ña, da cō cúu cuéntá Jesús. Ta tá cáji ini da coo da xihín ña já quéa cō ndítahan jándacoo ña da. <sup>14</sup> Jáchi cája yí Ndióxi in dataa sahá ña ín da xihín ñájíhí da, ña cúu cuéntá Jesús. Ta jári cája yí Ndióxi in ñañaḥa sahá ña ín ña xihín yí ña, da cúu cuéntá Jesús. Jári cája yí Ndióxi jahyi na yóho ná a cácuu na tátuhun na cō xini Ndióxi. Ta xihín ña yóho cuu candaḥa ini na ndaja ín íchi cuéntá Jesús. <sup>15</sup> Joo tá cúni yí ndo á ñájíhí ndo, na cō cúu cuéntá Jesús jan, quee na cuḥun na já quéa quiahva ndó

ñamanì nù ná caja na ña. Jáchi cò ndítahan nù ndó caja ndúsa ndó xihín na cò xínì Ndióxi cán ña ná coo na xihín ndo. Jáchi cúnì Ndióxi ña ná canduu vii ndo. <sup>16</sup> Ta ni cò xínì ndo á ndiquehe yíi ndó á ñájíhí ndo íchi cuéntá Jesús, á a ndíquehe na ña.

<sup>17</sup> Ta cáxi tuhun i nù tóco ndihi na cúu cuéntá Jesús ndúu ndijáá veñuhu ña ndítahan coo na tá quiahva nasahin na tá nandihvi na íchi cuéntá Jesús jáchi quiahva já cúnì Ndióxi. <sup>18</sup> Ta tá naquihvi ndó íchi cuéntá Jesús ta sa ndácaan marca yiquí cuñu ndó còó caja toho a. Joo tá còó marca jan yiquí cuñu ndó cò ndítahan chícáan ndó ña yiquí cuñu ndó. <sup>19</sup> Jáchi còó caja toho a á ín marca yiquí cuñu ndó á còó a. Ña cúnì Ndióxi quéa ná caja ndó ña sáhndá mé á nù ndo caja ndó xihín ndinuhu ini ndó. <sup>20</sup> Ta ndítahan coo ndó tá quiahva nasahin ndó tá nandiquehe ndó íchi cuéntá Jesús. <sup>21</sup> Ta tá nasacuu ndó na naxeen xitoho ndó caja chúun ndó tá nandiquehe ndó íchi cuéntá Jesús já quéa cò ndítahan ndicani ini ndó sahá. Joo tá ná quiahva xitoho ndó íchi nù ndó ña ná quee ndó cuhun ndo já quéa caja ndó ña. <sup>22</sup> Jáchi da cúu cuéntá Jesús cúu dá da najaní Ndióxi nuú cuachi da vatí cándo da cája chúun da cuéntá xitoho da, da naxeen ñahá. Ta da naxica núná mé tá nandiquehe da íchi cuéntá Jesús cúu dá mozo cuéntá Jesucristo. <sup>23</sup> Jáchi yahvi ndivaha nachahvi Ndióxi saha ndo tá naxihí Jesucristo ndica crúxu ña ná cacomí a cuéntá saha ndo. Sahá ña cán quéa a ndíquiahva toho ndó mé ndó ndáha ñayivi ña ná cahnu na ndohó. <sup>24</sup> Candehé ndo ñani mí i, na cúu cuéntá Jesús. Ndítahan coo ndó tá quiahva nasahin ndó tá

naçana Ndióxi ndohó cacuu ndó cuéntá mé á jáchi ín mé á xihin ndo.

<sup>25</sup> Ta viti cúni cahan i sahá na tacú, na cámani tandaha. Coó naçachi toho Ndióxi xihin i sahá ña yóho ña cán quea cahan i ña cáhvi ini mí i sahá. Ta cuu candúsa ndó ña cahan i xihin ndo jáchi naçaja Ndióxi ñamani xihin i ña cúu u in da tácu ini. <sup>26</sup> Ta cáhan i ña ndítahan coo tacú in dataa jáchi ihvi ndivaha cáa tiempo ndúu viti. <sup>27</sup> Joo tá ín ñájíhí ndo, a jándacoo ndó ña. Ta tá coó ñájíhí ndo, a ndúcú ndó ña. <sup>28</sup> Joo a juú cuachi quea cája ndó tá ná tandaha ndo. Ta ni a juú cuachi quea cája in ña tacú tá ná tandaha ña. Joo mé a ndaa ná cahan i xihin ndo, yáncá a tá ná tandaha ñayivi jáchi cuahá ndivaha ndoho ini na. Ta co cúni ña ná ndoho ini ndó já sahá ña cán quea cahan i ña yóho xihin ndo.

<sup>29</sup> Candehé ndo ñani i, na cúu cuéntá Jesús. Ña cúni cachi i cúu ña yóho: Sa naçayati tiempo quixi Jesucristo. Sahá ña cán quea na ín ñájíhí xíní ñúhú ndíhi ini na caja chúun na cuéntá mé á tá quiahva cája chúun na tacú cuéntá mé á. <sup>30</sup> Ta ndá na ndúu cuéha ndivaha ndítahan caja na tátuhun na cájii ini. Ta na cájii ini ndítahan caja na tátuhun na ndúu cuéha ndivaha ini. Ta na xéen ñaha ñuyíví yóho ndítahan caja na tátuhun na xeen na ña co cúu ñaha na. <sup>31</sup> Ta na cómí ñaha ñuyíví yóho, xíní ñúhú ndindójó na sahá ñaha cán. Jáchi vaxi quivi ndíhi saha ñuyíví yóho xihin tóco ndíhi ñaha ín nu á.

<sup>32</sup> Ña cúni yehe quea ña ná a ndícani nahá ini ndó sahá ñaha ñuyíví yóho. Jáchi tá cámani tandaha in dataa já quea núná nu dá caja chúun da cuéntá Ndióxi xihin ndinuhu ini da. Ta ndúcú da ndá quiahva caja da ña cájii ini Ndióxi xihin. <sup>33</sup> Joo da

sa ñatandaha ndítahan caja chúun da ñuyíví yóho já ná cana ña cuxu ña vehe da. Ta cája da ña cájii ini ñájíhí da xihín. <sup>34</sup> In da ñatandaha co xini da ndía ndíhi chága ini da saha, á Ndióxi á ñájíhí da. Ta jári najihí tá cúú ná ña tacú ndíhi ini na caja na ña cúni Ndióxi jáchi ndíquiahva na mé ná ndáha Ndióxi ña ná cacomí a cuéntá saha yiquí cuñu na ta sahá ínimá ná. Joo najihí ndúu yíi ndíhi ini na sahá chuun vehe na jáchi cúni ña ña ná tahan ini yíi ná xihín ná.

<sup>35</sup> Cáhán i ña yóho xihín ndo jáchi cúni chindeé e ndohó ta co cáhán i ña sahá ña co cúni ña ná tandaha ndo. Ña cúni queá ná nuná nu ndó caja chúun ndó cuéntá Ndióxi xihín ndinuhu ini ndó ta ná a cáji nuu ni in ñaha nu ndó caja ndó ña cúni Ndióxi.

<sup>36</sup> Ta ndá da íin jahyi jíhí ta cáhán da ña ndítahan tandaha ña jáchi sa cuahá cuia ña já cuu quiahva da ña ña ná tandaha ña tá cúni da. A juú toho cuachi cúú ña yóho. <sup>37</sup> Ta tá cáhán ndo ña co ndítahan toho tandaha jahyi ndó ta cáhán ndo ña cájii ini ña ña coo mé ña já queá vaha va cája ndó tá co cája ndúsa ndó xihín ña ná tandaha ña. <sup>38</sup> Vaha cája in dataa tá sahan da ñamaní nuú jahyi jíhí da ña ná tandaha ña. Joo vaha chága cája da tá co cája ndúsa dá xihín ña ña ná tandaha ña.

<sup>39</sup> Ta a cuú tandaha in ñáñáha xihín inga dataa nani tácu yíi ña. Joo tá naxihí yíi ña já queá candoo núna nu ña tandaha tucu ña. Joo ndítahan tandaha ña xihín da cúú cuéntá Jesús. <sup>40</sup> Vatí cáhán i ña cajii chága ini ña tá ná a tandaha tucu ña. Ña yóho queá cáhvi ini i sahá ña yóho. Ta ínimá yíi Ndióxi queá

jácahan yehe cáchí i ña yóho xihín ndo.

## 8

### *Cáhan Pablo sahá ña najoco ñayivi nuú yoco*

<sup>1</sup> Ta viti cúni ndicani i nu ndo sahá ña ndítahan caja ndó xihín ña najoco na nuú yoco. Vatí cúu á ña ndaa tá cáchí java na ña xini vaha na sahá ña yóho joo tá cáhan yo cúu yó na xini vaha já quea casahá yo ndínehe jícó yo mí. Joo tá quíhvi ini ñani táhan í já ndindacú chága yó xihín ñaha Ndióxi. <sup>2</sup> Tá ndúu java na tañu ndó ta cáhan na ña sa xini na ndaja táhan ñaha, na yóho náha ña cámani cándaa ini na ña ndítahan cándaa ini na. <sup>3</sup> Jáchí mé a ndaa xini vaha Ndióxi ndá na cúu na quíhvi ini mé á.

<sup>4</sup> Ta viti cáhan i xihín ndo sahá ña najoco na nuú yoco. Cándaa cáxi ini ña coó a cúu toho yoco ndúu ñuyiví. Ta cándaa cáxi ini ña in tálaá Ndióxi cúu ndusa Ndióxi. <sup>5</sup> Vatí cáchí ñayivi ña ndúu cuahá ndióxi ta ndúu cuahá xitoho indiví xihín ñuyiví <sup>6</sup> joo mí cándaa vaha ini ña ín in túhún Ndióxi, mé a cúu tátá yo. Ta mé á quea nacavaha tóco ndihi ñaha. Ta nacavaha mé á mí ña ná caja cáhnu í mé á. Ta ín in túhún xitoho í ña cúu Jesucristo. Ta mé á quea cája ña ná coo tóco ndihi ñaha ta cája ña ná catacu mí viti.

<sup>7</sup> Joo a juú tóco ndihi na cúu cuéntá Jesús xini ña yóho. Jáchí java táhan na sa cája cáhnu yoco sanahá cán tá xixi na ña najoco ñayivi nuú yoco cáhan na ña cúu á ña najoco na nuú java ndióxi. Ta xihín ña yóho cáhan na ña cúu ná na sa nayuxu sahá ña naxixi na ña najoco ñayivi nuú yoco. Ta co xini na á ndítahan cuxu na ña á co ndítahan cuxu na ña. <sup>8</sup> Cándehé ndo. Co ndíquehe toho Ndióxi mí sahá



ñā xíxi. Jáchī cō cúu yó nā íin chága saha tá xíxi in ñaha. Ta ni cō cúu yó nā cōo saha tá cō xíxi ñaha. <sup>9</sup> Joo xíni ñúhú candehé ndo ñā ná a jándicava ndó inga na nuú cuachi sahá ñā cája ndó jan. Jáchī vatí xíni vaha ndó ñā cuu cuxu ndó ñā cán joo ndúu java na vitá cuahan íchi cuéntá Jesús. <sup>10</sup> Cúu á tátuhun sácōo ndó cuxu ndó nu cáyahvi ñā najōcō nā nuú yōcō jáchi sa xíni ndo sahá ñā yóho. Ta nani íin ndó xíxi ndó jan yáha in da cúu cuéntá Jesús, da vitá xihín ñaha Ndióxi. Ta sahá ñā xíni da ndohó já quíhvi da jan xíxi da xihín ndo vatí cáhán da cúu á cuachi. <sup>11</sup> Xihín ñā cája ndó jan cuu jándicava ndó da vitá xihín ñaha Ndióxi cán nuú cuachi vatí xíni vaha ndó ñā cō cája ndó cuachi tá ná cuxu ndó ñā najōcō nā nuú yōcō. Xíni ñúhú ndicuhun ini ndó ñā naxihí Jesucristo sahá da jan. <sup>12</sup> Tá jándicava ndó ñani ndó, da vitá xihín ñaha Ndióxi cán nuú cuachi já queá cája ndó cuachi nuú Jesucristo viti. <sup>13</sup> Sahá ñā cán queá tá ná jándicava i ñani i nuú cuachi sahá ñā xíxi i cuñu, ñā najōcō nā nuú yōcō cája i cuéntá a cúxu ga i ñā já ná a jándicava i inga da nuú cuachi.

## 9

### *Ñā núná nuú in na apóstol caja*

<sup>1</sup> Mé a ndaa yehe cúu u in apóstol cuéntá Jesucristo sahá ñā cán queá núná nuú i caja i ñā cája in apóstol. Jáchī mí i sa naxini i xihín nuú i Jesucristo, xitoho í. Ta mé ndó nandiquehe ndó íchi cuéntá mé á sahá chuun nācāja i ta ñā yóho náha ñā mé a ndaa cája chúun i cuéntá mé á. <sup>2</sup> Cája i cuéntá ndúu java na ta cō ndíquehe na yehe tátuhun in apóstol cuéntá Jesucristo. Joo ndóhó ndítahan ndiquehe

ndó yehe jáchi nanduu ndó cuéntá mé á sahá chuun naca ja i. Ta xihín ña yóho náha ña mé a ndaa cúu u in apóstol cuéntá mé á.

<sup>3</sup> Ta ña yóho cúu tuhun ndúcú ñehe e nuú na cáhan núu sahá i jan: <sup>4</sup> Íin sahá i ña ná coto ndó yehe. <sup>5</sup> Ta tá ná coo ñájíhí i, ña cúu cuéntá Jesús íin sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í. <sup>6</sup> Á cáhan ndo ña in túhún yehe xihín Bernabé cúu nde da coó saha ña ná coto na cúu cuéntá Jesús ndehe, va ha. <sup>7</sup> Jáchi ni in túhún toho soldado co quehe da jiuhún mé dá ta já xito da mé dá. Jári ndá da xútu yitó uva, cuu caxí da uva cána nu dó cán jáchi já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchi já cáni a coo a. <sup>8</sup> Ta a juú cahán ndo ña cáhan i ña quíxi jiní mé cuití ví jáchi cáchí ley mé Moisés ña yóho viti. <sup>9</sup> Já cáchí a já: “A chícaun ñúnú yuhú tindi quí nani cája chúun rí sání rí trigo. Joo xíní ñúhú quiahvún ñamaní nu rí caxí rí a”, cáchí tuhun Ndióxi. Joo co ndíhi ini Ndióxi sahá tindi quí cuití va. <sup>10</sup> Saha mí ví naca hyí Moisés ña yóho ta saha mí ví cáhan ña yóho tá cáchí a já. Cúu á tátuhun cája da xútu tátí xihín da jáquee tátí jáchi ndátí ndíví da ndiquehe da táhan nuní cán sahá ña naca ja chúun da xihín á. <sup>11</sup> Tá naca han nde tuhun Ndióxi xihín ndó já cúu á tátuhun naci hin nde tata cuéntá Ndióxi ini ínima ndo. Saha ña cán quea ndítahan nu ndo chindeé loho ndó ndehe xihín ña cómi ndo jáchi najána ha nde tuhun Ndióxi nu ndo. <sup>12</sup> Ta mé a ndaa íin chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo coó nacaja ndúsa nde xihín ndo ña ná caja ndó ña. Ta cuahá tañu cája ndeé ini nde jáchi co cúni nde caji nuu nde ña ná ndicuíta nuu tuhun vaha sahá Jesucristo. <sup>13</sup> Mé ndó sa cándaá vaha ini ndó ña núná nuú na cája chúun ini veñuhu cuxu na ña jóco ñayivi nu Ndióxi. Ta na cája chúun nu náa Ndióxi veñuhu núná nu ná cuxu na cuñu quíti, rí najoco ñayivi nu Ndióxi. <sup>14</sup> Ta quiahva já cája chúun nde cuéntá Jesucristo, xitoho í cáhan nde tuhun vaha saha mé á. Ta nasahnda mé á chuun ña ná coto na cúu cuéntá mé á ndehe sahá chuun cája nde. <sup>15</sup> Joo ni in túhún tañu coó nacaja ndúsa i xihín ndo ña ná coto ndó yehe vatí cáni nu ndó caja ndó ña. Ta ni co cáhyí i carta yóho nu ndo já ná quiahva ndó ñaha nuú i, vaha. Jáchi mé a ndaa ín vaha ini i cáhan i tuhun Ndióxi xihín ndo ta coó caja toho a ña ná quivi i joco.

<sup>16</sup> Yehe co ndíñehe jícó i mí i sahá ña xíca nuu i cáhan i tuhun vaha sahá Jesucristo nuú ñayivi jáchi cúu á chuun ndítahan nuú i caja i. Ta ndáhví nahá nacuu u tá ná caja sáa ini i caxi tuhun i ña. <sup>17</sup> Tá ná cája i chuun yóho sahá ña cúni mí i cuití va já queá cuu quehe e yahvi sahá. Joo co cája toho i já jáchi nacaxi Ndióxi yehe cahán i tuhun mé á sahá ña cán queá ndúsa cája i ña. <sup>18</sup> Ta sa mé yahvi quehe e sahá chuun cája i queá cáji ini i tá cáhan i tuhun vaha sahá Jesús nuú ñayivi ta co cháhvi na sahá. Ta cáji ini i jáchi co cája ndúsa i xihín ndo ña ná coto ndó yehe tá quiahva cája ndó xihín java ga na cáhan tuhun Ndióxi xihín ndo.

<sup>19</sup> Vatí mí i co cúu u mozo ñayivi joo cája chúun i mí i tátuhun mozo saha tóco ndihi ñayivi. Jáchi cáxi

tuhun i tuhun vaha sahá Jesucristo nu ná já ná cuu ndicuaḥa chága na cúu cuéntá Jesús. <sup>20</sup> Tá xíca nuu i tañu na Israel ndája i mí i tátuhun in da Israel jáchi ña cúní quéa ná ndiquehe na íchi cuéntá Jesús. Ña cúní cachi i quéa tá ín i tañu na cája ley Moisés in cája i xihín ná vatí co ndíco i íchi cuéntá ley Moisés viti. Joo cája i ña sahá ña cúní i ña ná ndiquehe na íchi cuéntá Jesús. <sup>21</sup> Ta tá xíca nuu i tañu na co cája ña sáhdá ley Moisés já cája i tá quiahva cája mé ná jáchi cúní ña ná ndiquehe na íchi cuéntá Jesús. Joo co cája i cuachi tá quiahva cája na cán jáchi sáhdá ley Ndióxi chuun nuú i viti ta cája i ña cúní Jesucristo cuití va. <sup>22</sup> Ta tá xíca nuu i tañu na vitá xihín ñaha Ndióxi já quéa jánuu ndáha i mí i jáchi cúní ña ná ndindacú na xihín tuhun mé á. Ña cúní cachi i xihín ndo quéa ndája i mí i tátuhun ndá na nacuu va jáchi cúní quee vaha i xihín ná já ná ndihvi na íchi cuéntá Jesús ña ná cacu ndaa ínima ná. <sup>23</sup> Cája i tóco ndihi ña yóho já quéa ná ndicuíta nuu tuhun vaha cáhan sahá Jesucristo. Jáchi xihín ña yóho caja cuaḥa Ndióxi ñamaní xihín i.

<sup>24</sup> Candehé ndo. Sa xíní vaha ndó ña tá jáquehe táhan java taḥa tuhun da ña ná cunu da, mé a ndaa tóco ndihi da ndúcú ndée da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caja ri ndóhó va. Xíní ñúhú nducú ndo cuhun vaha ndó íchi cuéntá Jesús janda quiahva ná xínu coo ndó janda nu ndíhí cuí já ná quiahva Ndióxi nu ndo ña ndítahan ndiquehe ndó. <sup>25</sup> Tóco ndihi ñayivi tá cája tiahva na mé ná ña ná cuhun na cunu na, co cúní na caja na ndá ña nacuu jáchi ndáá na mé ná. Tóco ndihi

ñā yóho cája na sahá ñā cúni ñā quee vaḥa na ñā ná ñeḥe ná in tiyivi ita sánúu jini ná vatí cama chá íchi ita cán. Joo mí ndúcú ndéé yo cuaḥan yó íchi cuéntá Jesús jáchi ñā ndátí mí quiaḥva Ndióxi nu yo co ndíhi saḥa andā ama cáa quivi. <sup>26</sup> Joo co cúu u in da xínu cuáá. Ta ni co cúu u tátuhun in da jácana yiquí nuú tachi. Jáchi ndúcú ndéé e quee vaḥa i já ná ndiquehe e ñā quiaḥva Ndióxi nuú i. <sup>27</sup> Ñā cája i queá cája ndúsa i xihin yiquí cuñu i ñā ná caja i ñā cúni Ndióxi. Jáchi a juú tiaḥva náá jándacoo Ndióxi yeḥe vatí mí i cúu u da najánaḥa tuhun Ndióxi nuú ñayivi.

## 10

### *Cáḥan Pablo ñā co ndítahan caja cáhnu na yoco*

<sup>1</sup> Candehé ndo ñani i, ñā cúu cuéntá Jesús. Co cúni ñā ná ndindójó ndo ndá quiaḥva ñacaja Ndióxi saḥahá xihin tásáhnu jícó yo tá ñasandaca mé á ñā yucú íchí cán. Ñacaja mé á ñā ná xinu in vico núhú xoo nuú cuaḥan ñā ñā ná candaca a ñā. Ta ñachindeé a ñā ñā ná cuu cojo cava na tañuhú naní tañuhú cuáhá. <sup>2</sup> Ta tóco ndihi ñā cán in ñanduu ndihi na xihin Moisés tá ñayaha na tañuhú nani ndáca vico núhú ñā. Nasacuu a tátuhun ñacandúta ná ñā ná cacomí Moisés cuéntá saḥa ná. <sup>3</sup> Ta tóco ndihi ñā cán ñaxixi na ñā ñachindahá Ndióxi, ñā ñaquixi a nu ná chí indiví. <sup>4</sup> Ta quiaḥva já tóco ndihi ñā cán ñaxihi na ticuií, dó ñasahān mé á nu ná cohó na. Mé ticuií cán cúu dó dó ñacana tixi in tóto. Ta mé tóto cán cúu á tátuhun yuhú nuú Jesucristo, mé a ñasahin xihin ná nani ñaxica nuu na yucú íchí cán. <sup>5</sup> Joo cuaḥá ndivaḥa táhan ñā cán ñacaja na ñā núu ñā co cáji

íní Ndióxi xihin. Sahá ña cán quéa naxihí na mé yucú íchí nu xíca na cuahan na cán.

<sup>6</sup> Tóco ndihi ña nayaha yóho jánaha nu mí ña co ndítahan ndiava iní ña co táhán ini Ndióxi xihin tá quiahva ñacaja na cán. <sup>7</sup> Sahá ña cán quéa coto a juú caja cáhnu ndó yoco tá quiahva ñacaja java na cán jáchi já cáchí tuhun Ndióxi já: “Tóco ndihi ñayivi cán ñasacanduu na xíxi na ta xíhi na ta já nandicuita na xita sáhá na ña cája cáhnu na yoco”, já ñacaja na cáchí tuhun Ndióxi. <sup>8</sup> Joo mí xíní ñúhú candaa í mí já ná a cája í cuachi ña quihvi nuu í xihín inga najihí á xihín inga dataa tá quiahva ñacaja java na cán. Ta sahá cuachi ñacaja na cán naxihí oco uní mil na in túhún quivi. <sup>9</sup> Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi cája í. Jáchi quiahva já ñacaja java na cán va ta sahá ña cán naxihí na ñacaja cuahá coo. <sup>10</sup> Coto a cahán cuéhé ndó saha Ndióxi tá quiahva ñacaja java tásáhnu jícó yo cán. Jáchi sahá ña ñacaja na naxihí na ñacaja tátó Ndióxi, mé a xíca sáhní ñahá.

<sup>11</sup> Tóco ndihi ña nayaha xihin tásáhnu jícó yo cúú á ña náha nu yo ña co ndítahan quehe núu í Ndióxi. Ta ñacahyi a nuú tuhun Ndióxi já ná cuni mí, yó ndúu tiempo yóho ña co ndítahan caja í tá quiahva ñacaja na cán jáchi sa ñacayati quivi ndihi saha ñuyívi. <sup>12</sup> Ña cán quéa tá cáhán ndo cuahan vaha ndó íchí cuéntá Ndióxi já quéa xíní ñúhú candaa vaha ndó mé ndó já ná a ndícava ndó nuú cuachi. <sup>13</sup> Candehé ndo. Xíní ñúhú ndicuhun iní ndó ña a juú mé ndó cuití quixi tondóhó nuu jáchi quíxi tondóhó jan nu tóco ndihi java ga ñayivi.

Ta ndítahan candeeé ini ndó Ndióxi jáchi a quiahva toho mé á ñamani ña ná quixi tondóhó nánhu nu ndo ña co cándeeé ndó xihin. Ña cája Ndióxi quéa chindeé a ndohó tá ná quixi tondóhó nu ndo já ná cuu caja ndeeé ini ndó tá ná ndoho ndó ña.

<sup>14</sup> Cándehé ndo ñani i, na cúu cuéntá Jesús. Xíni ñúhú jándacoo vaha ndó ña cája cáhnu ndó yoco. <sup>15</sup> Tá quiahva cáhan i xihín ñayivi tácu ini quiahva já cáhan i xihin ndo. Ta mé ndó cándaá vaha ini ndó á ndaa á a ndaa quéa cáhan i xihin ndo. <sup>16</sup> Ná ndiquiahva í ndixahvi nu Ndióxi tá ndicuhun ini sahá ña nacaja Jesucristo tá naxihí a saha yo. Jáchi tá xihí vino ña yii já cúni cachi a ña in nanduú xihin mé á sahá ña naxita nii mé á ndica cruxu saha yo. Ta jári tá xixí pan ña yii ña sáhdá java nu táhan í cúni cachi a ña in nanduú xihin mé á jáchi ndiquiahva yiquí cuñu a saha yo. <sup>17</sup> Ta vatí cuahá ndivaha cúu yó joo in túhún pan sáhdá java í xixí jáchi xihín ña yóho náha ña in cúu ndihí xihín Jesucristo.

<sup>18</sup> Xíni ñúhú candehé ndo ndá quiahva cája na Israel jáchi tá sáxi na cuñu quítı, rı najoco inga na nu náa cán já cúu á tátuhun mé ná nasahni na mé quítı cán ta najoco na ri. Quiahva já yáha xihin mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña. <sup>19</sup> Joo xíni ñúhú ndicuhun ini ndó tá cáchi i ña yóho xihin ndo co cúni cachi i ña ín sahá yoco. Ta ni co cúni cachi i ña ín chága sahá cuñu najoco na nuú yoco a juú ga inga cuñu. <sup>20</sup> Ña cúni cachi i xihin ndo quéa tá ná joco ñayivi, na co xini Ndióxi jan in quítı nuú yoco cúu á tátuhun joco na jan ri nuú tiñáhá va.

Ta cō cája toho na ña nu Ndióxi. Ta cáxi tuhun i ña yóho xihin ndo já ná a cáxi ndó cuñu jan jáchi tá ná caxí ndó ña cacuu a tátuhun najoco ri ndóhó va ña nuú tiñáhá. <sup>21</sup> Jáchi a cuú cuhun ndo coho ndó ña najoco na nuú rí quini ta já quixi ndó coho ndó ña yii cuéntá Jesucristo, xitoho í. Ta ni a cuú cuxu ndó ña najoco na nuú rí quini ta já cuxu ndó ña yii, ña xíxi na tá ndícuñun ini na ña naxihí Jesucristo, xitoho í. <sup>22</sup> A cája ndó ña yóho jáchi cúu á tátuhun cúni ndó jácojo ndó ini Ndióxi. Xíní ñúhú ndícuñun ini ndó ña cō cúu ndó na ndacú chága a juú ga Ndióxi.

*Sahá ña quíhvi iní ñani táhan í cō ndítahan caja í ndá ña naçuu cúni mí caja í*

<sup>23</sup> Ndúu java na ta cáchi na já: “Núná nu yo caja í ndá ña cúni mí caja í.” Vatí ña yóho cúu á ña ndaa joo a juú ndihi ña cája í cája vaha xoho. Mé a ndaa núná nu yo caja í ndá ña cúni mí joo cō chindeé a mí cuahnu í xihín ñaha Ndióxi. <sup>24</sup> Cō ndítahan nu yo nducú yó ña vaha mí cuití yo. Ndítahan ndihi iní caja í ña vaha sahá ñani táhan í.

<sup>25</sup> Cuu caxí ndó ndijáá cuñu cáyahvi nuú yahvi ta a ndaca tuhún ndo ndájá naquixi a já ná a cáhvi ivi johu ini ndó xihin á. <sup>26</sup> Jáchi ñaha Ndióxi, xitoho í cúu ñuyívi yóho xihin tóco ndihi ña iin nu á.

<sup>27</sup> Candehé ndo. Tá ná cana in na cō cúu cuéntá Jesús ndóhó ña ná cuhun ndó cuxu ndó xihin ná, cuáhán ndo tá cúni ndo ta cuxu ndó tóco ndihi ña sácú na nu ndó cuxu ndó. Ta a ndaca tuhún ndó na á naquixi a nuú yoco. Cuxu ndó ña jáchi tá ná ndaca tuhún ndo na já cuu casáhá ndicani ini ndó xihin á. <sup>28</sup> Joo tá sa naçaxi tuhun yachi na xihin



ndo ña cúu á cuñu najoco na nuú yoco já quéa a cúxu toho ndó ña. Jáchí tá ná cuxu ndó ña já quéa caja ndó ña ná a váha cuu ini mé na cán. <sup>29</sup> Cahan i ña yóho jáchi cúni ña ná caja vaha ndó sahá inga na. Co cahan i ña saha mé ndó.

Mé a ndaa ndúu java ndó ta cahan ndo ña co ndítahan ndihi ini ndó sahá ña cáhvi ini inga na jáchi cahan ndo ña núná nu ndó caja ndó ña cúni ndo. <sup>30</sup> Ta java ndó cahan ndo ña tá sa nandiquiahva ndó ndixahvi nu Ndióxi sahá ña xíxi ndó já quéa a cuú cahan núu ñayivi sahá ña cája ndó. <sup>31</sup> Joo cáchi i xihin ndó ña xíní ñúhú candehé vaha í ña cája í ná a jándicava í inga na nuú cuachi. Jáchí janda xihín ña xíxi ta xihín ña xíhí, xíní ñúhú caja cáhnu í Ndióxi. <sup>32</sup> Co ndítahan cacuu na jándicava inga ñayivi nuú cuachi jáchi tá cája í já cúu yó tátuhun yuu cándúhu jácachihin sahá ñayivi. A cája ndó já xihín na Israel ta ni xihín na tóho ta ni xihín na cúu cuéntá Jesús. <sup>33</sup> Ta tóco ndihi ña cája i, cája i ña ná cajii ini ndihi ñayivi xihin. Ta co ndúcú u ña vaha mí i jáchi ndúcú u ña ná cajii ini ñayivi já ná cuu cacu ndaa ínimá ná.

## 11

<sup>1</sup> Xíní ñúhú caja ndó tá quiahva cája yehe jáchi quiahva já cája i ña nacaJa Jesucristo, xitoho í.

*Ña ndítahan nuú najihí caja na tá cája cáhnu na Ndióxi*

<sup>2</sup> Cajii íni i xihin ndo, ñani i, na cúu cuéntá Jesús. Jáchí níi tiempo ñúhu ini ndó sahá i ta cája ta cája ndó ña najánaha i nu ndo. <sup>3</sup> Joo cúni ña ná candaa ini ndó ña cúu Jesucristo jiní nuú in in ta. Ta

quiahva já in in taa cúú dá jini nu ñájíhí da. Ta quiahva já Ndióxi cúú á jini nuú Jesucristo. <sup>4</sup> Sahá ña cán quéa tá cō cándaa in dataa yijini dá nani xíca tahví da nu Ndióxi á nani cáhan da tuhun Ndióxi nu táca ñayivi já quéa náha ña cō cája cáhnu da Jesucristo, mé a cúú jini nu mé dá. <sup>5</sup> Ta in ñáñáha tá cō chíjahvi ña jini ña nani xíca tahví ña nu Ndióxi á nani cáhan ña tuhun Ndióxi nuú ñayivi veñuhu já quéa náha ña quéhe núu ña yí ña, da cúú jini nu mé ñá. Cúú á tátuhun najatá ña jini ña. <sup>6</sup> Jáchí tá cō chíjahvi in ñáñáha jini ña janda vaha chága ví ná jatá táhyí ña jini ña. Joo tá cáhán ña ña quini canáha jini ña tá ná jatá táhyí ña jini ña já quéa xíní ñúhú chíjahvi ña jini ña. <sup>7</sup> Cō ndítahan toho nuú in dataa chíjahvi da jini dá veñuhu jáchí mé dá cúú dá da ñacavaha Ndióxi xihín yuhú nu mé á. Ta mé dá cúú dá da náha ndá quiahva cáhnu cúú Ndióxi. Ta náha in ñáñáha ña yí ña cúú da jini nu ñá. <sup>8</sup> Jáchí xíní ñúhú ndicuhun ini ndó ña cōó ñatavá toho Ndióxi lásá yiquí ndícá ñáñáha já ñacavaha mé á dataa, vaha. Ña ñacaja mé á quéa ñatavá a lásá yiquí ndícá dataa ta já ñacavaha mé á ñáñáha. <sup>9</sup> Jihna ñúhú ñacavaha Ndióxi dataa ta já ñacavaha mé á in ñáñáha chindeé ña da. <sup>10</sup> Ta sahá ña jihna ñúhú ga ñacavaha Ndióxi dataa sahá ña cán quéa ndítahan nuú in ñáñáha chíjahvi ña jini ña ná nahá ña nu tátō Ndióxi ña mé a ndaa cája cáhnu ña yí ña. <sup>11</sup> Joo mí, na cúú cuéntá Jesús ndítahan candaá iní ña xíní ñúhú táhan taa xihín ñáha. <sup>12</sup> Vatí ñacavaha Ndióxi ñáñáha nu cuítí xihín lásá yiquí ndícá dataa joo viti tóco ndihi dataa cácu da ñuyíví yóho cája najíhí. Joo tóco ndihi ñayivi tácu na jáchí

já cúni Ndióxi.

<sup>13</sup> Mé ndó xíní ñúhú candehé ndo á vaha á a váha toho ña ná a chíjahvi in ñáñáha jini ñá nani xíca tahví ña nu Ndióxi veñuhu. <sup>14</sup> Jáchi sa cánda vaha iní ña a váha toho cája dataa tá íin nání ijí jini dá. <sup>15</sup> Joo ndisáhnú náha ñáñáha tá íin nání ijí jini ña jáchi Ndióxi nasahan ijí jini ñá nu ña já ná chíjahvi a jini ña. <sup>16</sup> Joo tá ndúu java na ta co táhán ini na xihín ña cáhan i yóho já quéa co cúni toho i nditúhún ihvi i xihín ná sahá ña yóho. Jáchi xíní ñúhú candaa ini na ña ndijáa java ga na cúu cuéntá Jesús cája na tá quiahva cáchí i yóho tá táca na veñuhu.

*Jánani Pablo na cúu cuéntá Jesús jáchi co cája ndisáhnú na tá táca na cajíni na ña yíi cuéntá Jesús*

<sup>17</sup> Ta íin inga ñaha cúni cahan i xihín ndó saha ta co táhán ini i xihín á. Jáchi nañehé e tuhun ña co cája vaha ndó tá táca ndo veñuhu. <sup>18</sup> Candehé ndo. Sa nañehé e tuhun ña sáhdá java táhan ndó tá táca ndo cája cáhnú ndó Ndióxi. Ta cája i cuéntá cándúsa i ña cáchí na saha ndo. <sup>19</sup> Vatí mé a ndaa náha xíca a ña ndítahan cahnda táhan ndó já ná cuu cuni ñayivi ndá ndó cúu ndusa cuéntá Jesús ta ndá ndó co cúu cuéntá Jesús. <sup>20</sup> Ta sahá ña sáhdá táhan ndó nu táca ndó jan, náha ña quéhe núu ndó ña yíi xíjini ndó ta xihín ña yóho co cúu ga ña cuéntá Jesucristo, xitoho í. <sup>21</sup> Jáchi tá ndíndaa hora cajíni ndó tá in tá in ndó sa jihna ñúhú ndo ndáva ndó cuahan ndó quehe ndó ña cajíni mé cuití ndo. Ta java ndó ni co ñéhe ndó ña cuxu ndó. Joo java ndó xíhi ndó janda jáxini ndó mé ndó. <sup>22</sup> Vaha chága ná cuxu ndó ta ná coho ndó vehe ndó a juú ga ña ná quixi ndó quehe

núu ndó veñuhu Ndióxi. Ta a váha cája ndó jáchi co ñéhe na ndahví ña cuxu na cája ndó ta xihín ña yóho cácahan nu ná. A cándati toho ndó ña cajji ínii xihín ña cája ndó yóho jáchi a juú ña vaha quea cája ndó.

*Ña ndítahan caja na cúu cuénta Jesús tá xijini na ña yii cuénta Jesús*

*(Mt. 26:26-29; Mr. 14:22-25; Lc 22:14-20)*

<sup>23</sup> Ña jánaḥa i nu ndo yóho cúu ña najánaḥa Jesucristo, xitoho í nuú i. Jáchi mé ñuu tá cámaní ndiquiahva na mé á ndáḥa na ihvi a já naṭiin a in pan. <sup>24</sup> Tá nandihí nandiquiahva ndixahvi nu Ndióxi já naṣahnda java ña ta já naçachi a já xihín ná: “Mé pan yóho cúu á tátuhun yiquí cuñu i ña ndiquiahva i saḥa mé ndó. Xínii ñúhú caja ndó ña yóho ña ná ndicuhun ini ndó ña naḥihí i saḥa ndó”, naçachi Jesús. <sup>25</sup> Ta tá nandihí naḥijini na cán já naṭiin a in vaso nu ñúhu tó uva. Ta já naçachi a já: “Dó ñúhu ini vaso yóho cúu dó tátuhun níi i, dó cuṭa saḥa ndó. Ta xihín dó yóho xinu co nuú tuhun naṣahan Ndióxi nuú ñayivi saḥa tá naçachi a jácacu a ñayivi. Ndijáa tañu tá ná coho ndó mé tó uva, dó yii ndítahan ndicuhun ini ndó ña naḥihí i saḥa ndó”, naçachi Jesús. <sup>26</sup> Saḥa ña cán quea ndijáa tañu tá táca ndo xíxi ndó pan ta xíhi ndó tó uva yóho cúni cachi a ña ndicuhun ini ndó ña naḥihí Jesucristo, xitoho í saḥa ndó. Ta xínii ñúhú caja ndó ña janda quiahva ná quixi tucu mé a ñuyívi yóho.

<sup>27</sup> Candehé ndo. Tá ná cuxu ndó pan ta tá ná coho ndó tó uva, ña yii cuénta Jesucristo, xitoho í ta co ín vií ínima ndo já quea cája ndó cuachi nu mé

á ta quéhe núu ndó ña naxihí a ndica crúxu saha ndo. <sup>28</sup> Sahá ña cán quéa tá cámani casáhá cajíni ndó ña yíi cuéntá Jesús xíní ñúhú coto ndojó jihna ndó mé ndó á víi ínima ndo nu Ndióxi á coó víi a. <sup>29</sup> Jáchi tá ná cuxu ndaja nacuú ndó ña yíi cuéntá Jesús já quéa náha ña quéhe núu ndó mé á. Jáchi ña xíxi ndó jan cúú á tátuhun yiquí cuñu mé á ta dó xíhi ndó jan cúú dó tátuhun níi á. Ta tá ná quehe núu ndó ña já quixi ña ndoho ini ndó caja Ndióxi. <sup>30</sup> Sahá ña cája ndó jan cuaha táhan ndó quíhvi ta cuaha ndó cávitá ndó ta anda java na sa naxihí ná sahá ña naquehe núu na ña yíi cuéntá Jesús. <sup>31</sup> Joo tá ná coto ndojó yo mí ña á ín víi ínima yo nu Ndióxi já quéa a ndítahan toho nu mé a cúú xitoho í caja víi a sahá cuachí. <sup>32</sup> Joo tá jándoho mé á ini mí cúú á sahá ña co cúni a ña ná ndoho iní xihín ñayivi ñuyívi tá ná xinu co quívi caja víi mé a cúú xitoho í sahá cuachi nacija na cán.

<sup>33</sup> Candehé ndo, ñani i, na cúú cuéntá Jesús. Ña ndítahan caja ndó cúú ña yóho. Tá ná nditaca ndó cajíni ndó ña yíi cuéntá Jesús xíní ñúhú candati táhan ndó janda quiahva ná taca tóco ndihi ndó. <sup>34</sup> Ta tá cuíco ndó já quéa xíní ñúhú cuxu ndó vehe ndó já ná a jándoho Ndióxi ini ndó sahá ña cája ndó ña núu tá táca ndo cajíni ndó ña yíi jan. Ta caja víi i sahá java ga ñaha tá ná saa i coto nihni i ndohó jan.

## 12

*Ña ñéhe táhvi ñayivi nu ínima yíi Ndióxi*

<sup>1</sup> Candehé ndó, ñani i, na cúu cuéntá Jesús. Cáhyí i ña yóho nu ndo jáchi cúni ña ná candaá ini ndó ndaja ín ña sáhan ínimá yíi Ndióxi nu yo.

<sup>2</sup> Mé ndó sa candaá vaha ini ndó ña tá cámaní ndiquehe ndó íchi cuéntá Jesús já nasacuu ndó tátuhun ñayivi cuáá jáchi nasanduu ndó ndáha tá nuú yoco, ña coó tachi cáhan. <sup>3</sup> Ta viti cúni caxi tuhún i xihín ndo ña ni in ñayivi a cuú chícaan na chahan jata Jesús tá ta ínimá yíi Ndióxi quéa sáhan tuhun nu ná cahan na. Ta tá cáchí na xihín ndinuhu ini na ña Jesús cúu xitoho na já quéa náha ña ínimá yíi Ndióxi quéa sáhan tuhun nu ná cahan na.

<sup>4</sup> Cuahá nuú ñaha ñéhe táhvi ñayivi caja na cuéntá Ndióxi ta in tuhún ínimá yíi Ndióxi sáhan ña nu ná. <sup>5</sup> Cuahá nuú chuun cuu caja ñayivi cuéntá Ndióxi ta tóco ndihí cája chúun í cuéntá mé a cúu xitoho í. <sup>6</sup> Ta sa jíin sa jíin cája in in í chuun nasahan Ndióxi nu yó caja í. Joo in tuhún mé á quéa sáhan ña yóho nuú in in í caja í. <sup>7</sup> Ta sáhan Ndióxi in ñaha nuú in in í já náha ña ñúhu ínimá yíi Ndióxi iní ta xihín ña yóho cuu chindeé yo tóco ndihi na cúu cuéntá Jesús. <sup>8</sup> Ínimá yíi Ndióxi yóho quéa cája ña ná cuu candaá ini java ñayivi ndaja ín ña vaha xihín ña a váha ta já ndicani na ña nuú ñayivi. Ta sa mé ínimá yíi Ndióxi quéa cája ña ná cuu cahan ñayivi ña ndíchí ndivaha. <sup>9</sup> Ta cája mé ínimá yíi Ndióxi yóho xihín java na ña ná candeé cáhnu ini na mé á. Ta sáhan mé ínimá yíi Ndióxi nuú java na ña ná cuu ndaja vaha na na quíhvi. <sup>10</sup> Java na ñéhe táhvi ná caja na ña xituhún. Ta java na ñéhe táhvi ná jáyaha na tuhun nacahan Ndióxi xihín ná nuú ñayivi. Ta java na ñéhe táhvi ná ndicuni na ndá na

cúu n̄ cája chúun cuéntá ínim̄a ȳii Ndióxi ta ndá n̄a cō cája chúun toho cuéntá mé á. Ta java na ñehe táhvi ná cahan n̄a tuhun ña cōo nasatiahva na. Ta java na ñehe táhvi ná nducú ñehe na ña cún̄i cachi tuhun cáhan n̄a cán nuú ñayivi. <sup>11</sup> Ta sa mé ínim̄a ȳii Ndióxi cája tóco ndihi ña yóho ta in tühún mé á sáhan nuú in in ñayivi ña sácú ini a caja chúun vaha na xih̄in.

*In cúu tóco ndihi n̄a cúu cuéntá Jesús sahá ña cãndeé ini na mé á*

<sup>12</sup> Candehé ndo. Cuahá ndivaha nu ndáca yiquí cuñu í joo in víxí cúu á. Quiahva já lin xih̄in n̄a cúu cuéntá Jesús. <sup>13</sup> Ta quiahva já yáha xih̄in tóco ndihi mí, cōo caja toho a á cúu yó n̄a Israel á cō cúu yó n̄a Israel. Ta cōo caja toho a á cúu yó n̄a cómí in xitoho cuéntá saha, á cúu yó n̄a xica núná mé. Jáchi cája ínim̄a ȳii Ndióxi ña cúu yó tátuhun in víxí ñayivi sahá ña in nanduú xih̄in Jesucristo tá nacandúta yó cuéntá mé á. Ta in tühún ínim̄a ȳii mé á nasacu a ini ínim̄a in in í.

<sup>14</sup> Xíní ñúhú ndicuhun iní ña a juú in víxí nu ndáca yiquí cuñu í jáchi cuahá ndivaha nu ndáca yiquí cuñu ñayivi. <sup>15</sup> Candehé ndo. Cúu á tátuhun tá ná cahan in xoo saha yo já cáchí a já: “Yehe cō cúu toho ñ ndáha ñayivi sahá ña cán quéa cōo chuun toho ñ nuú yiquí cuñu na”, cáchí a. Joo cō cája toho ña cáhan saha yo yóho jáchi cúu á cuéntá yiquí cuñu í. <sup>16</sup> Ta cúu á tátuhun tá ná cachi in johó í já cáchí a já: “Yehe cō cúu toho ñ nduchú núú ñayivi sahá ña cán quéa cōo chuun toho ñ nuú yiquí cuñu na”, cáchí a. Joo cō cája toho ña cáhan johó í yóho jáchi cúu á cuéntá yiquí cuñu í. <sup>17</sup> Jáchi

caja mé ndó cuéntá ndaja caja í cuni joho í tá níí cúú yiquí cuñu í ná cacuu a nduchú núú yo. Ta ndaja caja í tahmí ñaha tá níí cúú yiquí cuñu í ná cacuu a joho í. <sup>18</sup> Joo in in ña ndáca yiquí cuñu í yóho nasacu Ndióxi ña mé nu ndítahan coo a jáchi já nasacu ini a caja. <sup>19</sup> Xíní ñúhú caja ndó cuéntá tá in víxí joho ná candaca níí cúú yiquí cuñu í já quéa co ín ndihi toho yiquí cuñu í. <sup>20</sup> Ta vatí cuahá ndivaha nu ndáca yiquí cuñu in in í joo in víxí cúú yiquí cuñu í. Ta quiahva já ín a xihín na cúú cuéntá Jesús.

<sup>21</sup> Candehé ndo jáchi sácú u in quiahva nu ndo: Nduchú núú yo a cúu cachi a xihín ndáha yo ña co xíní ñúhú a ña. Ta ni yiquí jíní yo a cúu cachi a xihín saha yo ña co xíní ñúhú a ña. <sup>22</sup> Ña yáha xihín yiquí cuñu í cúú ña yóho. Java tañu cáhán yo ña vitá in ñaha ndáca yiquí cuñu í joo ña jan xíní ñúhú chága yó ña. <sup>23</sup> Ta mé xoo yiquí cuñu í ña cáhán yo coo cuahá saha, ña co cúni yo ña ná candehé ñayivi, ña cán cúú ña chíjahví vaha í <sup>24</sup> vatí co xíní ñúhú caja í já xihín ñaha ña cuu candehé ñayivi. Xihín ña yóho cuu candaa iní ndá quiahva nacavaha Ndióxi in in xoo yiquí cuñu í ta cuu candaa iní ndaja candaa vaha chága yó ña cáhán yo coo cuahá saha. <sup>25</sup> Ta xihín ña yóho co sáhdá java táhan yiquí cuñu í jáchi in in xoo yiquí cuñu í ndíhi ini a sahá java ga xoo yiquí cuñu í. <sup>26</sup> Ña cán quéa tá ndícuehe in xoo yiquí cuñu í ndijáa java ga ña cán ndíhíhví a sahá ña ndóho in xoo yiquí cuñu í. Joo tá vii cája na xihín in xoo yiquí cuñu í já quéa cáji ini java ga xoo yiquí cuñu í.

<sup>27</sup> Ta tóco ndihi ndó, na cúú cuéntá Jesús cúú



ndó tátuhun yiquí cuñu Jesucristo jáchi in nanduu ndihi ndó xihín á ta in in ndó cúú ndó tátuhun in xoo yiquí cuñu a. <sup>28</sup> Ta tá quiahva ín chuun cája in in xoo yiquí cuñu í quiahva já ín chuun caja in in na cúú cuéntá Jesús. Jihna ñúhú naçaxi Ndióxi na apóstol ta já naçaxi a na jáyaha tuhun Ndióxi nuú ñayivi ta já naçaxi a na jánaħa tuhun Ndióxi nuú ñayivi ta já naçaxi a na cája ña xitúhún. Ta já naçaxi a na ndája vaħa na quíhvi xihín na chindeé ñayivi xihín na sáhdá chuun nuú java ga ñayivi xihín na cáħan tuhun ña coó nasatiahva na. <sup>29</sup> Joo a juú ndihi na cán cúú apóstol. Ta ni a juú ndihi na cúú ná na jáyaha tuhun cáħan Ndióxi nuú ñayivi. Ta ni a juú ndihi na jánaħa ñayivi. Ta ni a juú ndihi na cája ña xitúhún. <sup>30</sup> Ta ni a juú ndihi na ndája vaħa na na quíhvi. Ta ni a juú ndihi na cáħan tuhun ña coó nasatiahva na. Ta ni a juú ndihi na tiaħva nducú ñeħe ña cúni cachi tuhun cáħan na cán. <sup>31</sup> Joo mé ndó xini ñúhú ndinducú ndo ña ná quiahva Ndióxi in ña vaħa chága nu ndo. Ta viti cúni jánaħa i ña cúú ña vaħa chága nu ndo.

## 13

### *Ña ndítahan caja í tá quíhvi ini ñayivi*

<sup>1</sup> Tá ná cuu caħan i tá nuú tuhun cáħan ñayivi ndúu ñuyivi yóħo ta tá ná cuu caħan i tuhun cáħan táto Ndióxi joo tá co quíhvi ini i ñayivi já quea coó saħa toħo ña cáħan i. Jáchi xihín ña jan cúú u tátuhun in caa jácasá na, á tátuhun in caa xoo tá jácasá na ña. Quiahva já ín i tá co quíhvi ini i ñayivi.  
<sup>2</sup> Ta ni coó saħa ña ná cacuu u in da jáyaha tuhun cáħan Ndióxi nuú ñayivi tá co quíhvi ini i ñani táhan

i. Jáchĭ tá cō quíhvĭ inĭ ĩ ñayivi cōó caja toho ña ná cuu candaꝝ inĭ ĩ tóco ndihi ñaha ta ni cōó caja toho a tá xínĭ tóco ndihi ña xínĭ da ndíchĭ ta ni cōó saha toho tá cándéé cáhnu ndivaha inĭ ĩ Ndióxi janda quiahva cuu cahan ĩ xihín in yúcu ña ná ndicanda ña. Cōó saha toho tóco ndihi ña yóho tá cō quíhvĭ inĭ ĩ ñani táhan ĩ. <sup>3</sup> Ta vatí ná ndicahnda ĩ tóco ndihi ña cómĭ ĩ ta já quiahva ĩ ña nuú na ndahví cōó sahá toho ña cája ĩ tá cō quíhvĭ inĭ ĩ ñayivi. Ta ni cōó caja toho ña ná ndiquiahva ĩ yiquí cuñu ĩ ña ná cayĭ a sahá ña cahan ĩ tuhun Ndióxi tá cō quíhvĭ inĭ ĩ ñayivi.

<sup>4</sup> Jáchĭ tá mé a ndaa táhyí quíhvĭ inĭ ñayivi cō ndíhi inĭ xihín ná. Ta tá quíhvĭ inĭ na táhvĭ inĭ saha ná ta cō cáhĭhvĭ toho inĭ xihín ná. Ta ni cō cája lándꝝ yō nu ná ta ni cō cája cáhnu í mí nu ná. <sup>5</sup> Tá quíhvĭ inĭ ñayivi ĩin toní ñúhú yō xihín ná ta cō cájhnda yó ñaha nu ná jáchĭ cō ndúcú yō ña vaha mé cuití yō. Ta ni cō xójō inĭ xihín ná. Ta ni cō quéhé cuéntá sahá ña núu cája na xihín yō tá quíhvĭ inĭ na. <sup>6</sup> Ta tá quíhvĭ inĭ ñayivi cō cájĭi toho inĭ tá cája núu na joo cájĭi inĭ tá cája na ña ndaa. <sup>7</sup> Tá quíhvĭ inĭ ñayivi ĩin tiahvĭ í ndoho inĭ saha ná ta cáhvi inĭ ña vaha cuití va saha ná. Ta cándúsa í ña cája na ña ndaa. Ta sahan ndeé inĭ xihín tóco ndihi ñaha.

<sup>8</sup> Tá mé a ndaa quíhvĭ inĭ ñani táhan í já quéa anda ama cáa quivĭ a ndíhi sahá ña quíhvĭ inĭ na. Joo vaxi quivĭ a jáyaha ga ñayivi tuhun cahan Ndióxi xihín ná nuú ñayivi jáchĭ vaxi quivĭ ndihi sahá. Ta a cahan ga na tuhun ña cōó nasatiahva na. Ta vaxi quivĭ ndihi sahá ña ndíchĭ ĩinĭ ñayivi. Joo a ndíhi toho saha ña quíhvĭ inĭ táhan í. <sup>9</sup> Jáchĭ chá cuití xínĭ yó saha Ndióxi ta chá cuití tiahvĭ í jáyaha í tuhun

cáhan Ndióxi nuú ñayivi. <sup>10</sup> Joo tá ná xinu coo quivi ndaja Ndióxi ña ná nduú ñayivi vii já quéa a cúní ñúhú ga yó ña tóco ndihi java ga ña ndihi saha cán jáchi sa nanduú ñayivi vii nu mé á.

<sup>11</sup> Candehé ndo. Tá nasacuu u in taa loho nacahan i tá quiahva cáhan na valí ta quiahva já nacahvi ini i ta quiahva já nacaja i. Joo tá nasahnu i najándacoo i ña cája na valí. <sup>12</sup> Viti co cándaá vaha iní ndá quiahva cáa Ndióxi. Cúú á tátuhun tá sándehe yo nuú in yutátá ña co jíñu vaha ga. Joo vaxi quivi cuní mé á tá quiahva cáa. Viti cuahá ñaha co cándaá iní saha mé á. Joo vaxi quivi candaa iní saha mé á tá quiahva xini mé á mí viti.

<sup>13</sup> Ín uní nuú ñaha ña a ndíhi sahá. Ta ña yóho cúú á: ña cándéé iní Ndióxi, ta inga cúú ña ndátí casaá, ta inga cúú ña quíhvi iní Ndióxi xihín ñani táhan í. Ta cúní Ndióxi ña ná caja í ndihuní ña yóho joo ña cáhnu chága cúú ña quíhvi iní Ndióxi xihín ñani táhan í.

## 14

### *Tá cáhan ñayivi tuhun ña coo nacatiahva na*

<sup>1</sup> Xíní ñúhú ndíhi ini ndó quíhvi ini ndó ñani táhan ndó. Ta xihín ndinuhu ini ndó ndinducú ndo ña sáhan ínima yíi Ndióxi nu yo. Ña xíní ñúhú ndíhi chága ini ndó ndinducú ndo cúú ña ná cuu jáyaha ndó tuhun cáhan Ndióxi xihín ndó nuú ñayivi. <sup>2</sup> Jáchi ndá na nacuu cáhan tuhun ña coo nacatiahva na já quéa cáhan na xihín Ndióxi joo co cáhan na xihín ñayivi jáchi co cándaá ini ñayivi ña cáhan na. Ña cáhan na cúú ña naquixi cuéntá ínima yíi Ndióxi ta cúú á ña co xíní ndíhi ga ñayivi. <sup>3</sup> Joo

ñayivi tiaḥva jáyaha tuḥun cáḥan Ndióxi xihín ná nuú ñayivi cája na ña ná cuu cuahnu chága na cúu cuéntá Jesús xihín tuḥun cáḥan Ndióxi. Ta sáhan na tuḥun ndeé ini ñayivi ta quiahva já jáxinu chága na ini na cán. <sup>4</sup> Ta na ñeḥe táhvi cáḥan tuḥun ña coó naḥatiahva na sáhnú mé cuití va na xihín tuḥun sáhan Ndióxi nu ná caḥan na. Joo na tiaḥva jáyaha tuḥun cáḥan Ndióxi nuú ñayivi chíndeé na na cúu cuéntá Jesús ña ná cuahnu chága na xihín ñaha cuéntá Ndióxi.

<sup>5</sup> Mí i cájii íní i tá ná cuu caḥan ndihi ndó tuḥun ña coó naḥatiahva ndó. Joo cájii chága ini i tá ná jáyaha ndó tuḥun cáḥan Ndióxi xihín ndó nuú ñayivi jáchi xíní ñúhú chága ña yóho a juú ga ña ná caḥan ndó tuḥun ña coó naḥatiahva ndó. Vaha cája ndó ña ná caḥan ndó tuḥun ña coó naḥatiahva ndó tá ín in na tiaḥva nducú ñeḥe ña cúni cachi tuḥun cáḥan ndo nuú ñayivi já quéa ná cuu cuahnu na cúu cuéntá Jesús xihín mé tuḥun cán. <sup>6</sup> Xíní ñúhú candehé vaha ndó ña cáḥan i xihín ndo, ñani mí i na cúu cuéntá Jesús. Coó saḥa toho ña cája i tá ná saa i coto nihni i ndohó ta já casáhá i caḥan i inga tuḥun ña co cándaḥ ini ndó. Tá ná caja i já ndaja caja ndó candaḥ ini ndó tuḥun Ndióxi. Ña ndítahan caja i quéa caḥan i xihín ndo ña najánaḥa Ndióxi nuú i. Ta ndítahan caḥan i ña ndichí cuéntá Ndióxi. Ta ndítahan caḥan i tuḥun naḥan Ndióxi nuú i jáyaha i ña nu ndo. Ta ndítahan jánaḥa i ña ndaa cuéntá Ndióxi nu ndo.

<sup>7</sup> Sácú u in quiahva nu ndó saḥá in tóyoo xihín dó jácaha. Ndaja caja ñayivi candaḥ ini na ndá yaa tívi yo tá co tiáhva í tiví vaha í, á tá co tiáhva í jácaha vaha í. <sup>8</sup> Ta ndaja caja na soldado cacu tiaḥva na

mé ná ña ná cuhun na cani táhan na tá ta co tiáhva vaha da tiví trompeta tiví da do. <sup>9</sup> Quiahva já yáha ri xihin mé ndó jáchi tá co cáhan ndó tuhun ña cuu candaá ini ñayivi ndaja caja ri na cán candaá ini na ña cáhí ndo. Cúú á tátuhun cáhan ndó nu táchi cuití va. <sup>10</sup> Cája i cuéntá iin cuahá ndivaha nuú tuhun cáhan ñayivi ndijáá ñuyíví. Joo ndijáá tuhun yóho cáxí cáhan nuú ñayivi cáhan na mé tuhun yóho. <sup>11</sup> Joo tá co candaá ini i ña cáhan inga ñayivi xihín i já cúú u tátuhun in da tóho nu mé ná. Ta na cán cacuu na tátuhun in na tóho nu mí i sahá ña co candaá ini i tuhun cáhan na. <sup>12</sup> Sahá ña cán queá tá mé a ndaa cuni ndó ndiquehe ndó ña sahan ínimá yí Ndióxi nu ndo já queá xíní ñúhú ndinducú ndó ña ná cuu chindeé ndó na cúú cuéntá Jesús ná cuahnu chága na xihín tuhun Ndióxi.

<sup>13</sup> Ña cán queá ndá ndó ñehe táhvi cáhan ndó tuhun ña coo nacatiahva ndó já queá xíní ñúhú caca ndó nu Ndióxi ña ná cuu ndicani ndó ña cuni cachi a nuú ñayivi. <sup>14</sup> Jáchi tá ná casahá cáhan i tuhun ña coo nacatiahva i nani xíca tahví i nu Ndióxi já queá mé a ndaa cája cáhnu i Ndióxi xihín ínimá i joo co cája i ña xihin xíní túní i jáchi co candaá ini i ña cáhan i. <sup>15</sup> Ndía caja i. Ña xíní ñúhú caja i queá caca tahví i nu Ndióxi xihin ínimá i ta xihin xíní túní i. Ta quiahva já xíní ñúhú cata i xihin ínimá i ta xihin xíní túní i viti. <sup>16</sup> Candehé ndó. Ná caja í cuéntá tá ndúu ndó veñuhu ta cásahá ndo cáhan ndó tuhun ña coo nacatiahva ndó nani cája cáhnu ndó Ndióxi xihin ínimá ndo ta ndaja coo quíhvi in ñayivi ini veñuhu, na co candaá cuahá ini sahá ñaha cuéntá Ndióxi. Ta xíní johu na ña cáhan ndo joo a cúu caja na ndiquiahva na ndixahvi

nu Ndióxi in nuú xihín ndo jáchi co cándaá ini na tuhun cáhan ndo. <sup>17</sup> Vati ndató ndivaha cáhan ndo ndíquiahva ndó ndixahvi nu Ndióxi joo co chindeé a na cán ná cuahnu na xihín tuhun Ndióxi jáchi co cándaá ini na tuhun cáhan ndo. <sup>18</sup> Ndiquiahva i ndixahvi nu Ndióxi jáchi cáhan cuaha chága i tuhun ña coó nasatiahva i a juú ga ndóhó. <sup>19</sup> Joo nani jánaha i ndóhó ini veñuhu cáji chága íni i cahan chá cuití va i tuhun já ná cuu candaa cáxi ini ndó ña cáhan i. Jáchi ndá chuun quéa ná cahan cuahá nahá i tuhun ña co cándaá ini ndó.

<sup>20</sup> Candehé ndo ñani i, na cúu cuéntá Jesús. A cáhvi ini ndó tá quiahva cáhvi ini na valí. Xíni ñúhú cahvi ini ndó tá quiahva cáhvi ini ñayivi sa tácu ini. Vati mé a ndaa xíni ñúhú caja ndó tá quiahva cája na valí, na co cája cuachi. <sup>21</sup> Xíni ñúhú ndicuhun ini ndó ndaja cáchi ley nacahyi Moisés sanahá tá nacachi Ndióxi já: “Vati ná chindahá i na cáhan java tuhun tóho nuú ñayivi Israel joo a cúni johó na nuú cahan na tóho cán jáchi sáa ini na Israel”, nacachi Ndióxi. <sup>22</sup> Tá cáhan ndó tuhun ña coó nasatiahva ndó nani cája cáhnu ndó Ndióxi co chindeé cuahá ña yóho na cúu cuéntá Jesús cuahnu na xihín tuhun Ndióxi vati mé a ndaa na co xíni tuhun Ndióxi catóntó na xihín ña yóho. Joo tá jáyaha ndó tuhun cáhan Ndióxi xihín ndó nuú na cúu cuéntá Jesús já cuu cuahnu chága na xihín tuhun Ndióxi vati co chindeé cuahá ña yóho na cámaní ndihvi íchi cuéntá Jesús. <sup>23</sup> Caja mé ndó cuéntá tá ná taca cuahá na cúu cuéntá Jesús ta casahá cáhan ndo tuhun ña coó nasatiahva ndó nani cája cáhnu ndó Ndióxi ta ndaja coo quihvi na co xíni tuhun Ndióxi nu ndúu ndó jan. Ta tá ná cuni

na ña sa jíin tũhun cáhan ndihi ndó já quéa cahán na ña cúú ndó na tachi. <sup>24</sup> Joo tá ná jáyaha tóco ndihi ndó tũhun cáhan Ndióxi nuú ñayivi ta ndaja coo quihvi in na co xini tũhun Ndióxi. Ta tá ná cuni johó na ña cáhan ndo já quéa tahnda ini na sahá cuachi na ta já casahá ndicani ini na sahá ña núu cája na. <sup>25</sup> Ta já nahma na cuachi na nuú ñayivi ta já ndicava xiti na caja cáhnu na Ndióxi. Ta xihín ña yóho candaa ini na ña mé a ndaa táhyí íin Ndióxi tañu ndó.

*Tóco ndihi ña cája ndó cuénta Ndióxi xini ñúhú caja ndó ña xihín toni ñúhú*

<sup>26</sup> Candehé ndó, ñani i, na cúú cuénta Jesús. Tá ná nditaca ndihi ndó caja cáhnu ndó Ndióxi ndítahan nuú java ndó cata ndó salmo ta java ndó jánaha ndó nuú ñayivi. Ta ndítahan nuú java ndó jáyaha ndó tũhun cáhan Ndióxi xihín ndó nuú ñayivi ta java ndó cahán ndó tũhun ña coo nacatiahva ndó. Ta ndítahan nuú java ndó nducú ñehe ndó ña cuni cachi tũhun cáhan na cán. Tóco ndihi ña cája ndó xini ñúhú chindee a ndohó ná cuahnu chága ndó xihín tũhun Ndióxi. <sup>27</sup> Ta ndítahan nuú ivi á uni ñayivi cuití va cahán na tũhun ña coo nacatiahva na. Joo tá in tá in na caja na ña. Ta ndítahan canduu na tiahva nducú ñehe na ña cuni cachi tũhun cáhan na jan. <sup>28</sup> Ta nu táca ndo tá coo ni in na tiahva nducú ñehe ña cuni cachi tũhun cáhan na jan já quéa vaha chága ná a cáhan na tũhun ña coo nacatiahva na. Ña vaha chága quéa ná cahán yaá na ña ná cuni johó mé ná xihín Ndióxi cuití va. <sup>29</sup> Ta quiahva já tá jáyaha na tũhun cáhan Ndióxi xihín ná nuú ñayivi ná cahán ivi á uni na cuití va.

Ta xíní ñúhú cahan na nani ndúu tútú java ga na veñuhu sándehe na á mé a ndaa cahan na cuéntá Ndióxi. <sup>30</sup> Cája i cuéntá nani jáyaha in na tuhun cahan Ndióxi xihin ná nuú ñayivi ta jácahan Ndióxi ini inga na ña ná jáyaha na tuhun cahan Ndióxi xihin na nuú ñayivi já quéa xíní ñúhú cacoo na nu cuítí cán. <sup>31</sup> Xihín ña yóho tá in tá in ndó cuu jáyaha ndó tuhun cahan Ndióxi xihin ndó nuú ñayivi. Já cuu catiahva na xíní johó ña yóho ña ná ndindeé chága ini na xihín tuhun Ndióxi. <sup>32</sup> Na jáyaha tuhun Ndióxi nuú ñayivi xíní ñúhú cañehe na quiahva xihín ña cája na nani ndáti na jáyaha na tuhun cán. <sup>33</sup> Jáchí cúní Ndióxi ña ná coo vaha iní caja í tóco ndihi ñaha ta ná a jána í nuú cája í ña.

Ta cáji ini mé á tá cája vaha ndó tá quiahva cája java ga na cúu cuéntá Jesús ndúu ndijáa ga ñuu. <sup>34</sup> Nani táca ndo veñuhu co ndítahan nuú najihí cahan na jáchí co cáni a nu ná cahan na. Ta co ndítahan nu ná cacomí na cuéntá sahá na veñuhu jáchí quiahva já sáhdá ley Moisés. <sup>35</sup> Ta tá cúní na candaa ini na sahá ña jánahá na veñuhu xíní ñúhú ndaca tuhún na yí ná sahá tá cása na vehe na. Jáchí co náha vaha tá cahan in ñáñáha nani táca na veñuhu.

<sup>36</sup> Xíní ñúhú ndicuhun ini ndó ña a juú ndóhó cúu na nandiquehe tuhun Ndióxi nu cuítí. Ta a juú ndóhó cuítí xíní tuhun Ndióxi, vaha. <sup>37</sup> Ta ndá na cahan ña nachutú ndaa ínima ná xihin ínima yii Ndióxi ña ná jáyaha na tuhun cahan Ndióxi xihin ná nuú ñayivi, mé na cán ndítahan nu ná ndicuni na ña cahan i ña sáhdá Ndióxi nuú i cahan i. <sup>38</sup> Joo tá co cúní na cán cuni johó na ña cahan i cuéntá Ndióxi já quéa a cúní johó ndó ña cahan na cán.



<sup>39</sup> Candehé ndo, ñani i, na cúu cuéntá Jesús. Xíní ñúhú ndihi ini ndó nducú ndó ña ná jáyaha ndó tuhun cáhan Ndióxi xihín ndó nuú ñayivi. Ta a cájí nuu ndó nuú na cúu cuéntá Jesús tá ñéhe táhvi ná nu Ndióxi cahan na tuhun ña coó ñasatiahva na. <sup>40</sup> Joo tóco ndihi ña cája ndó xíní ñúhú caja ndó ña xihín toni ñúhú já ná a jána ndó nu cája ndó ña.

## 15

### *Ndicani Pablo sahá quivi tá nanditacu Jesús*

<sup>1</sup> Candehé ndó, ñani i, na cúu cuéntá Jesús. Viti cúní ña ná ndicuhun ini ndó tuhun vaha sahá Jesús ña najánaaha i nu ndo. Mé tuhun vaha yóho sa nandiquehe vaha ndó ña ta cándéé vaha ini ndó a janda viti. <sup>2</sup> Ta jivi saha mé tuhun vaha najánaaha i nu ndo yóho cuu cacu ndaa ínimá ndo tá ná caja ndó ña najánaaha i nu ndo xihín ndinuhu ini ndó. Joo tá ná a cája ndó ña já quéa mé a uun va quéa nacandúsa ndó ña.

<sup>3</sup> Candehé ndó. Ña jihna ñúhú ñacaja i quéa najánaaha i ndohó ña ñacatiahva mí i cuéntá Jesucristo, mé á naxihí ndica crúxu sahá cuachí tá quiahva cáchí tuhun Ndióxi. <sup>4</sup> Ta najánaaha i ndohó ña najánduxu na mé á joo tá naxinu quivi uní já nanditacu tucu a tá quiahva cáchí tuhun Ndióxi coo. <sup>5</sup> Ta já ñanaaha mé á nu Pedro xihín nuú java ga táhan da uxu ivi naxica tuun xihín a cán. <sup>6</sup> Ta tá nandihí já ñanaaha mé á nu yáha ga nuú uhun ciento na cúu cuéntá mé á. Ta in naxini tocó ndihi na mé á. Ta cuaha táhan na naxini ñahá cán tácu yii va na vatí java na sa naxihí na. <sup>7</sup> Ta tá nandihí

já nanaha mé á nu Jacobo ta anda já nanaha mé á nu tóco ndihi na naxica tuun xihin á.

<sup>8</sup> Ta tá nu ndíhí já nanaha ri Jesús mé á nuú i vatí cúu u da nacacu tá sa nayaha mé tiempo tá naxica nuu Jesús ñuyíví yóho. <sup>9</sup> Yehe cúu u in apóstol joo ín chága saha tóco ndihi java ga na apóstol a juú ga yehe. Ta ni coó sahá i cahan na apóstol xihin i jáchi naxica nuu i nacaja xíxi i xihin na cúu cuéntá Ndióxi jihna. <sup>10</sup> Joo mé a ndaa cúu u in apóstol jáchi nacamáni Ndióxi yehe. Ta a juú ña uun cúu ñamaní nacaja Ndióxi xihin i jáchi cuahá ga chuun cája yehe cuéntá mé á a juú ga java ga na apóstol cán. Vatí mé a ndaa co cája chúun i xihin ndée mí i. Sahá ña táhvi ini Ndióxi sahá i sahá ña cán quéa chíndeé a yehe cája i chuun mé á yóho. <sup>11</sup> Joo co cája toho a á yehe á na java apóstol cán cája chúun chága. Ña vaha quéa tóco ndihi nde jánaha nde sahá Jesucristo ta mé ndó sa nacandúsa ndó ña najánaha nde nu ndo.

### *Vaxi quivi nditacu tóco ndihi ndi*

<sup>12</sup> Tá nacahan nde tuhun Ndióxi xihin ndo najánaha nde ndohó ña nanditacu tucu Jesucristo ta nacandúsa ndó ña. Joo viti java ndó cáchí ndo ña co ndítacu toho na sa naxihi. <sup>13</sup> Joo tá cáchí ndo ña co ndítacu toho na sa naxihi cúu á tátuhun co cándúsa ndó ña nanditacu tucu Jesucristo. <sup>14</sup> Ta tá co cándúsa ndó ña nanditacu tucu Jesucristo já quéa coó saha toho tuhun Ndióxi ña xíca nde jánaha nde nuú ñayivi. Ta xihin ña yóho mé a uun va cándéé ini ndó mé á. <sup>15</sup> Ta tá mé a ndaa coó nanditacu Jesucristo já quéa cúu nde na cahan ña tuhún saha Ndióxi jáchi cáchí nde xihin ndo

ñã mé Ndióxi najánditacu a Jesucristo. Joo tá co ndítacu toho ndii ta ndehe cáchi nde ñã nanditacu Jesucristo já quea cúu nde na tuhún. <sup>16</sup> Jáchi tá co ndítacu ndii já quea cúni cachi a ñã coó nanditacu toho Jesucristo. <sup>17</sup> Ta tá coó nanditacu Jesucristo já quea coó saha toho ñã cándeé ini ndó mé á ta cómi yii va cuachi cuéntá saha ndó. <sup>18</sup> Ta xihín ñã yóho cúni cachi a ñã a cácu ndaa toho ínima na cúu cuéntá Jesús tá ná quivi na. <sup>19</sup> Tá ndiyahvi ñã cúu yó cuéntá Jesús nani tácu yo ñuyívi yóho cuití va já quea ndáhví nahá nacuu.

<sup>20</sup> Joo mé a ndaa nanditacu ndusa Jesucristo. Ta mé á cúu á ñã nu cuití nanditacu. Ta vaxi quiví nditacu tóco ndihi yó, na cúu cuéntá mé á. <sup>21</sup> Candehé ndo. Naquihvi cuachi ñuyívi sahá ñã nacaja Adán, da nasacuu ta nu cuití ta sahá cuachi yóho nacasahá xihí ñayivi. Ta jivi sahá ñã nacaja Jesucristo tá naxihí a ndica cruxu cuu nditacu tóco ndihi na sa naxihí. <sup>22</sup> Xihí ñayivi sahá ñã naquixi na chichi Adán ta cája na ñã núu tá quiahva nacaja Adán sanahá. Ta viti sahá ñã cúu yó cuéntá Jesucristo catacú anda ama cáa quivi sahá ñã nacaja mé á. <sup>23</sup> Ta tá ná ndindaa nuú in in na nditacu na já nditacu na caja Ndióxi. Mé Jesucristo quea nanditacu nu cuití. Ta tá ná ndicó coo tucu mé á ñuyívi yóho já caja mé á ñã ná nditacu tóco ndihi na cúu cuéntá mé á. <sup>24</sup> Anda já ndihi saha tóco ndihi ñaha ñuyívi yóho jáchi jándihi Jesucristo saha tóco ndihi na cómi cuéntá sahá ñayivi ñuyívi yóho. Ta ndiquiahva tóco ndihi na cúu cuéntá mé á ndáha Ndióxi, tátá a já ná cacomí a cuéntá saha ná. <sup>25</sup> Jáchi Jesucristo quea ndítahan

nu cacomí cuéntá sahá na cúu cuéntá mé á janda quiahva ná xinu co quivi jándihi Ndióxi saha tóco ndihi na co cúní ñahá. <sup>26</sup> Ta janda nu ndíhí jándihi mé á sahá ña ná quivi ñayivi. Ta xihín ña yóho a quivi ga ñayivi. <sup>27</sup> Jáchi mé Ndióxi nandiquiahva tóco ndihi ñaha nuú Jesucristo já ná cacomí a cuéntá sahá. Joo tá cáchi tuhun Ndióxi ña cómí Jesucristo cuéntá saha tóco ndihi ñaha, co cúní cachi a ña cómí a cuéntá saha Ndióxi viti jáchi mé Ndióxi quea nandiquiahva tóco ndihi ñaha ndáha mé á ña ná cacomí a cuéntá sahá. <sup>28</sup> Ta tá sa cómí Jesucristo cuéntá saha tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchi cúu á in túhún jini já jahyi Ndióxi ta mé Ndióxi quea nandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

<sup>29</sup> Ndúu java ñayivi ta cándúta ná sahá na sa naxihí já ná cacu ndaa ínima ná. Joo cáchi na co cándúsa toho na ña ndítacu ndii. Ta ndá sahá quea cája na já tá co cándúsa na ndítacu ndii. Joo xini vaha í ña ndítacu ndii.

<sup>30</sup> Ndá chuun quea chícaan yo mí ndijáá ní quivi nuú tondóhó nuú cuu cahni na mí tá co cándúsa í ña ndítacu tucu ndii. <sup>31</sup> Candehé ndo, ñani i, na cúu cuéntá Jesús. Ndjáá ní quivi vaxi tondóhó nuú i. Ta jalóho cúní quivi i. Mé ndó cánda vaha ini ndó ña cáji ini i sahá in nanduu ndó xihín Jesucristo, xitoho í. Sahá ña cán quea ndítahan nu ndo candúsa ndó ña cáhan i xihín ndo. <sup>32</sup> Cuahá tañu naquihvi táhan i xihín ñayivi quini ñuu Efeso. Mé na cán cúu ná tátuhun quití yúcú. Joo coo saha toho ña ndóho ini i yóho tá mé a ndaa co ndítacu toho ndii. Jáchi

tá cō ndítacu toho ndii já quéa cuu cohó caja í tá quiahva cáchí java ñayivi tá cáchí ña já: “Cóho cuxu vaha í ta coho vaha í jáchi yó quiví itaan á iajá cúu yó.”

<sup>33</sup> A quiahva ndó ñamaní jándahvi inga na ndohó. Xíní ñúhú ndicuhun ini ndó in tuhun ña cáchí já: “Tá catáhan í xihín ñayivi, ña cō cája vaha já quéa játiví ña mí.” <sup>34</sup> Xíní ñúhú ndicáxi vaha ini ndó ta a cája ndó cuachi jáchi ndúu java ndó ta cō xíní toho ndó Ndióxi. Cáhan í ña yóho xihín ndo já ná cacahan nuu ndo sahá ña núu cája ndó.

### *Ndaja coo tá ná nditacu ndi*

<sup>35</sup> Cája í cuéntá ña ndúu java ndó ta ndícani ini ndó já cáhan ndo já: “Ndaja caja Ndióxi jánditacu a ña sa naxihi. Ndá yiquí cuñu ndiquehe na caja Ndióxi.” Já ndáca tuhún java ndó ndícani ini ndó. <sup>36</sup> Joo ña ndícani ini ndó saha jan cúu á ña tóntó ndivaha. Xíní ñúhú cándehé ndo ndá quiahva yaha xihín in tata tá chíhin na ña. Mé tata yóho xíní ñúhú quivi a já ná nduta utu loho nu á. <sup>37</sup> Tá xútu ñayivi, cō xútu toho na in yucu. Ña xútu na cúu mé tata ta cō cája toho a á cúu á trigo á inga nuú tata. <sup>38</sup> Ta mé Ndióxi quéa cája ña ná ñehe táhvi in in a cán ndá quiahva coo a ta ndá javí cañehe in in a. <sup>39</sup> Ta a juú in javí ñehe tóco ndihi ñaha. Sa jíin sa jíin javí in in a. Tátuhun yiquí cuñu in dataa, sa jíin ín yiquí cuñu da xihín yiquí cuñu quíti. Ta yiquí cuñu laa sa jíin ín a xihín yiquí cuñu tiyacá. Sa jíin nacaja Ndióxi xihín in in ña nacavaha mé á. <sup>40</sup> Ta quiahva já nacavaha Ndióxi ña ndúu indiví ta jíin va ndáa a. Ta jíin yiquí cuñu ñayivi ñuyíví yóho. Ta sa jíin quiahva ndató ña ín indiví ta sa jíin quiahva

ndató ña ín ñuyíví. <sup>41</sup> Jín ñacaja Ndióxi ña ná yehe candii ta jín ñacaja mé á ña ná yehe yoo. Ta jín ñacaja mé á ña ná yehe quimi ta ín java quimi sa jín sa jín yehe rí nuú inga rí. <sup>42</sup> Quiahva já yaha ri xihín ñayivi tá ná xinu coo quiví jánditacu Ndióxi na. Jáchi yiquí cuñu yó ña jánduxu na tixi ñúhu cúú á ña ndihi saha. Joo tá ná nditacu tucú já a ndihi ga saha yo anda ama cáa quivi. <sup>43</sup> Mé yiquí cuñu í jánduxu na tixi ñúhu yóho cúú á tátuhun in ña núu ndivaha jáchi ndihi sahá. Joo tá ná xinu coo quiví ndicoo tucu a caja Ndióxi já cacuu a ña ndató ndivaha jáchi a ndihi sahá. Ña jánduxu na tixi ñúhu cúú á ña vitá ndivaha joo ña nditacu tucu cacuu a ña ndacú vaha. <sup>44</sup> Jáchi tá ná jánduxu na mí tixi ñúhu, ña jánduxu na cúú yiquí cuñu cuéntá ñuyíví yóho. Joo tá ná nditacu tucú já ñehe yó inga yiquí cuñu, ña cúú cuéntá indiví. Jáchi tá ín yiquí cuñu cuéntá ñuyíví, ña ndihi saha ta já ín ri yiquí cuñu cuéntá indiví, ña a cuú ndihi saha.

<sup>45</sup> Cáchí tuhun Ndióxi ña tá ñacavaha Ndióxi Adán, da ñasacuu ta nū cuítí já ñacaja mé á ña ná catacu da. Joo cáhnu chága Jesucristo a juú ga Adán jáchi mé á cája ña ná catacu ñayivi anda ama cáa quivi. <sup>46</sup> Ña jihna ñúhú sahan Ndióxi nu yo cúú yiquí cuñu í, ña ndihi yachi saha. Ta tá nu ndihí já sahan mé á inga yiquí cuñu nu yo cuéntá indiví ta ña cán cúú á ña co ndihi saha. <sup>47</sup> Mé Adán, da ñacavaha Ndióxi nu cuítí ñasacuu da da ñacavaha mé á xihín ñundáhyi ta cúú dá da ñuyíví yóho. Ta Jesucristo, xitoho í, cúú á inga táhan dataa joo cúú á ña ñaquixi chí indiví. <sup>48</sup> Tá in tá in ñayivi ñehe na yiquí cuñu tátuhun yiquí cuñu Adán

jáchí cúú á ña ñacavaha Ndióxi xihín ñundáhyi. Joo ñayivi, na ndíquiahva mé ndáha Jesucristo vaxi quiví ndiquehe na inga yiquí cuñu cuénta indiví, ña co ndíhi saha. <sup>49</sup> Ta viti íin yiquí cuñu í tátuhun yiquí cuñu Adán joo vaxi quiví ndiquehé inga yiquí cuñu í cuénta indiví ta cacuu a tátuhun yiquí cuñu Jesucristo.

<sup>50</sup> Candehé ndo, ñani i, na cúú cuénta Jesús. Cúni caxi tuhun i xihín ndo ña a cúu toho cuhun yiquí cuñu í yóho indiví ña ná cacomí Ndióxi cuénta sahá jáchí mé yiquí cuñu í yóho co cúú á ña cuu catacu anda ama cáa quivi. Joo ña inga, ña quiahva mé á nu yo cán, a ndíhi toho sahá. <sup>51</sup> Ta viti cúni caxi tuhun i nu ndo sahá in ñaha nasahin jehé nuú ñayivi ta ña yóho quéa: A juú ndíhi toho í quiví jáchí tá ná xinu coo quiví quixi tucu Jesucristo ñuyiví yóho anda javí ndijama ndihí tá quiahva ndaa í ta mé Ndióxi quiahva inga yiquí cuñu nu yo. <sup>52</sup> Ta in náá cuití yaha ña yóho jáchí cacuu a tátuhun in ndicuaní nuu yo ta já ndahyi trompeta, mé dó ndahyi nu ndihí cuí cán já nditacu tóco ndíhi na sa naxihí ta a ndíco coo ga na quivi na. Ta mí, tá tácu yo, ña caja Ndióxi xihín yo quéa ndijama yiquí cuñu í. <sup>53</sup> Jáchí mé yiquí cuñu í ña ndíhi saha yóho a cúú toho nduu a tátuhun yiquí cuñu ña quiahva Ndióxi nu yo. Sahá ña cán quéa xíní ñuhú ndijama mé á yiquí cuñu í yóho já ná cuu cohó coo í xihín mé á anda ama cáa quivi. <sup>54</sup> Ta tá sa nandijama yiquí cuñu í ta nanduu a ña co ndíhi saha anda ama cáa quivi já quéa xinu coo nuú tuhun ña ñacachi na profeta sanahá: “Vaxi quiví ndíhi sahá ña xihí ñayivi jáchí ñacandeeé Jesucristo nasahnu a nuú ña

xíhi na. <sup>55</sup> Ta xihín ña yóho cája cáhnu í mé á jáchi a quívi ga ñayivi sahá ña naquee vaha Jesucristo”, cáchi tuhun Ndióxi. <sup>56</sup> Tá cája ñayivi cuachi já quivi tá quivi na sahá ña cája na. Ta cúú á tátuhun tá tín líhma na jáchi ndóho ini na sahá cuachi na. Anda sanahá ndivaha sáhdá ley Moisés ña quivi ñayivi sahá cuachi na jáchi ñéhe ín cuachi caja ña ná quivi ñayivi. <sup>57</sup> Joo ndixahvi Ndióxi jáchi chindeé a mí ña ná cuu quee vaha í sahá ña nacaja Jesucristo, xitoho í saha yo.

<sup>58</sup> Sahá ña cán quea ndítahan nu ndó, ñani máni i, na cúú cuénta Jesús, coo ndacú ini ndó xihín tuhun Ndióxi. Ta co xíní ñúhú jándacoo ndó ña cándeé ini ndó mé á. Ta ndítahan nu ndó ndíhi ini ndó caja chúun ndó cuénta mé á jáchi sa cándaá vaha ini ndó ña a juú ña uun cúú toho chuun cája ndó jáchi ín Jesucristo, xitoho í xihin ndo.

## 16

*Tá ndítaca jiuhún ña jasa na nuú na cúú cuénta Jesús*

<sup>1</sup> Ta viti cúni ndicani i nu ndo ndá quiahva ndítahan caja ndó tá jánditaca ndó jiuhún ña jasa ndo nuú na cúú cuénta Jesús ndúu ñuu Jerusalén. Xíní ñúhú caja ndó tá quiahva najánaña i nuú na cúú cuénta Jesús ndúu estado Galacia. <sup>2</sup> Ña ndítahan caja ndó quea: tá in in domingo xíní ñúhú tavá xóo ndó táhan jiuhún ña sácú ini ndó jasa ndo jatá ña nandiquehe ndó sahá chuun nacaja ndó. A cándati toho ndó janda quiahva ná saa i jan jáchi xíní ñúhú jánditaca cuéé ndó ña. <sup>3</sup> Ta caxi mé ndó ndá na cúni ndó cañehe jiuhún jan ñuu Jerusalén.



Ta tá ná x̄inu c̄oo ī jān chindahá ī nā ñā ná c̄uhun ñehe nā jiuhún ñuu cán. Ta chindahá ī in carta x̄ihin ná ñā ná quiahva nā ñā x̄ihín jiuhún jān nuú nā cúu cuéntá Jesús ndúu mé cán. <sup>4</sup> Ta tá cúni Ndióxi já c̄uhun ri yehe va x̄ihin nā jān andā ñuu Jerusalén.

*Sácú ini Pablo c̄uhun dā coto nihni dā nā cúu cuéntá Jesús ndúu java gā ñuu*

<sup>5</sup> Saā ī coto nihni ī ndohó cúni. Joo jihna ñúhú yāha ī coto nihni ī nā cúu cuéntá Jesús ndúu estado Macedonia. Ta andā jáví saā ī ñuu Corinto jān. <sup>6</sup> Ta tá cúni Ndióxi candoo nahá chá ī x̄ihin ndo. Á tá coó ta coo ī níi tiempo v̄ixi x̄ihin ndó jān. Ta tá sā ná quee ē c̄uhun ī inga ñuu já cuu chindeé ndó yehe. <sup>7</sup> Cō cúni toho ī coto nihni númí ī ndohó. Ñā cúni queā candoo tóo ī coo nahá chá ī x̄ihin ndo jān tá cúni Ndióxi. <sup>8</sup> Joo candoo tóo ī coo ī ñuu Efeso yóho jāndā quiahva ná yāha vicó Pentecostés. <sup>9</sup> Jáchi mé ā ndaā núná nuú ī cája chúun ī cuéntá Ndióxi yóho jáchi cuahá ndivaha na ndiquehe vāha na tuhun Ndióxi vatí ndúu cuahá na cō cúni yehe sahá chuun cája ī yóho.

<sup>10</sup> Tá ná x̄inu c̄oo Timoteo nū ndúu ndó ñuu Corinto jān, ndítahan ndiquehe vāha ndó dā já ná cajji íní dā coo da x̄ihin ndo. Jáchi cája chúun dā cuéntá Jesucristo, xitoho í tá quiahva cája chúun yehe. <sup>11</sup> Ā cándají ndó dā. Ñā ndítahan caja ndó queā chindeé ndó dā já ná coo vāha ini da quixi da nuú ī. Jáchi yehe x̄ihín java gā nā cúu cuéntá Jesús ndáti nde x̄inu c̄oo da nū ndúu nde yóho.

<sup>12</sup> Ta viti cúni ndicani loho ī nū ndó sahá ñaní, dā naní Apolos. Mí ī naxicā tahví ndivaha ī nū dá

ñā ná saa da xihín java ga na cúu cuéntá Jesús coto nihni da ndohó. Joo cō cūni da caja da ñā viti. Cāja i cuéntá tá ná nuná nu dá já saa da coto nihni da ndohó.

*Ndíndayí Pablo na cúu cuéntá Jesús ndúu ñuu Corinto*

<sup>13</sup> Cuéntá vaha coo ndó. Xíni ñúhú ndacú coo ini ndó jáchi cándéé ini ndó Jesús. A yíhví toho ndó. Canduu ndacú ndó íchi cuéntá Jesús. <sup>14</sup> Xíni ñúhú caja ndó tóco ndihi ñaha sahá ña quíhvi ini ndó ñani táhan ndó.

<sup>15</sup> Candehé ndo ñani i, na cúu cuéntá Jesús. Sa xíni vaha ndó sahá na vehe Estéfanos, mé na nu cuítí nandihvi íchi cuéntá Jesús estado Acaya. Sa nandiquiahva na mé ná chindeé na na cúu cuéntá Jesús. <sup>16</sup> Ñā cūni cacā i nu ndo cúu ñā ná cuni johó ndó ñā sáhdá na cán nu ndó caja ndó. Ta xíni ñúhú caja ndó tá quiahva cūni ndihi na cán jáchi chindeé na ñayivi ta cāja chúun vaha na cuéntá Jesús. <sup>17</sup> Cájii ini i jáchi naxinu coo Estéfanos xihín Fortunato xihín Acaico nu íin i ta natchindeé na yehe. Ta vatí a cuú quixi mé ndó nuú i <sup>18</sup> joo na yóho sahan na tuhun ndéé ini i xihín ñaha cuéntá Ndióxi tá quiahva nacaja na xihín mé ndó. Mé a ndaa ndítahan nu yo caja cáhnu í na cāja tátuhun na yóho.

<sup>19</sup> Na cúu cuéntá Jesús ndúu estado Asia chindahá na Ndióxi coo ndó. Ta jári Aquila xihín Priscila chindahá na Ndióxi coo ndó. Ta jári na cúu cuéntá Jesús táca cāja cáhnu Ndióxi vehe na cán chindahá na Ndióxi coo ndó. <sup>20</sup> Tóco ndihi na cúu cuéntá Jesús ndúu chóho chindahá na Ndióxi coo

ndó. Ta xíní ñúhú cahan Ndióxi xihín táhan ndó ta tatí yúhu táhan ndó ta yii caja ndó ña.

<sup>21</sup> Yehe cúú Pablo ta xihín ndáha mí i cáhyí i ña yóho nu ndó ta chindahá i Ndióxi coo ndó.

<sup>22</sup> Ta ndá na co quíhvi ini Jesucristo já ná cuhun cháhan jata ná. Cama chá ná quixi Jesucristo, xitoho í.

<sup>23</sup> Ña cúni quéa ná caja cuaha Jesucristo, xitoho í ñamaní xihín ndo. <sup>24</sup> Quíhvi ini i tóco ndihi ndó jáchi tóco ndihí cúú yó cuéntá Jesucristo, xitoho í. Já ná coo.

**Tuhun saá ña najá<sup>ndacoo</sup> Jesucristo nu yo: El  
Nuevo Testamento en el mixteco de  
Silacayoapan  
New Testament in Mixtec, Silacayoapan  
(MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Silacayoapan

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f